




Digitized by the Internet Archive
in 2014

<https://archive.org/details/titiflaviiclemen00vitr>

TITI FLAVII
CLEMENTIS
VIRI CONSULARIS,
ET MARTYRIS
TUMULUS

Illustratus.



U R B I N I.

TYPIS Ven. Capellæ Sanctissimi SACRAMENTI,
Per Antonium Fantauzzi.


MDCCXXVII.

PRÆSIDUM PERMISSU.

THE
ELEMENTS
OF
ARITHMETIC
AND
ALGEBRA



BY
JOHN H. COOPER
OF THE
UNIVERSITY OF CALIFORNIA
AT BERKELEY



TITI FLAVII
CLEMENTIS
Viri Consularis, & MARTYRIS
Tumulus illustratus.



MINENTISSIMUS ANNIBAL ALBANUS Tituli S. Clementis S. R. E. Presbyter Cardinalis & Camerarius, non tantum eruditione singulari, ac bonarum litterarum amore, sed praesertim religione, pietate, & rerum sacrarum studio S. M. CLEMENTI XI. Pontifici O. M. similimus, tantoque Patruo dignissimus,

die XXII. Januarii anni MDCCXXV. accessit ad suam illam S. Clementis Papae & Martyris Basilicam, Romae in Caelio Monte, atque adeo in Regione Caelimontana sitam,


quam alii ^(a) secundam, alii ^(b) tertiam Urbis regionem faciunt. Optimi Principis consilium erat S. Ignatii Antiocheni Episcopi, & Martyris ossium partem, quæ sub Altari Majori recondita esse credebatur, eruere, & argenteis thecis, quàm fieri posset, elegantissimè & magnificentissimè inclusam, Fidelium publicæ venerationi proponere. Quare Altare Majus subruui, egeri terram, & locum totum aperiri jubet. Verùm nihil tum quidem ibi repertum est præter capsulam plumbeam, quâ ossa aliquot, & ossium fragmenta continebantur; cineres præterea sacro cruore concreti, vas vitreum effractum, urceus fictilis, Crux gemina, altera lignea, altera ærea, & imago cerea duplex, quæ agni formam utrinque referebat. Capsulæ imposita erat tabula marmorea, quæ ex altera pagina litteras habebat tribus versibus digestas ad eam planè formam, quâ illas incidi curavimus.

FAVS CÆMMR
HÆ F LCTET
LEO · I · DOCT · X · IS · CŌ · VI · A · SP · EG

In

(a) Vid. lib. Phil. Rondinini de S. Clemente Papa, & Martyre, ejusque Basilica l. 2. c. 2. p. 213.
(b) Vid. Illustrissimum Joan. Vignolium ad librum Pontif. p. 13.

In altera verò ejusdem tabulæ pagina tria erant, pro-
ut hic exhibemus, monogrammata.



Illam inscriptionem illustrandam suscepi, ut Eminentissimi Cardinalis, & obsequerer studio, & voluntati parerem. 1. Dicam quomodo legi debeat hæc inscriptio. 2. proponam conjecturas de tempore, quo posita fuisse videtur in eo, in quo reperta est, loco. 3. declarabo quis sit ille Flavius Clemens, cujus memoriæ dicata est.

I.

QUOMODO LEGENDA SIT HÆC INSCRIPTIO.

PArtis adversæ lineæ duæ priores sic omnino legendæ sunt: *Flavius Clemens Martyr hic feliciter est tumulatus*. Tertia linea facilius est dicere quomodo non sit legenda, quàm quomodo legenda sit. Et quia minutiori charactere scripta est, erit fortasse qui suspicetur alio tempore scriptam eam esse, præsertim cum & litterarum forma nonnihil diversa sit, verbi gratiâ E in linea tertia, & in prioribus lineis duabus; & litterarum nexus, & implica-
tiones

tiones multæ sint in prioribus lineis, in tertia nullæ. Verum ego ne id quidem affirmo, & omnino malo ingenuè fateri nescire me quod nescio, quàm vel quidquam affirmare temere, vel in rebus ejusmodi nimium divinare. Suus enim esse debet non tantum in affirmando, quod non certò scias, sed etiam in conjectando modus. Atque *utinam*, ut aiebat ille ^(c) *tam facile vera invenire possim, quàm falsa convincere.*

Certè non crediderim hìc commemorari *S. Leonem* Romanum Pontificem hujus nominis *primum*, atque Ecclesiæ *Doctorem*, & *Sixtum* aut *Xistum* seu *Xystum* Martyrem, *Sextum Apostolicæ Pontificem* Ecclesiæ. Primum enim *Sixtus* & appellari ante *Leonem* debuit, & *VIII*, certè non *VI*. dici Apostolicæ Ecclesiæ Pontifex, seu Pastor. Deinde *S. Leoni Magno* & *Leonis Primi*, & *Doctores* nullâ aliâ voce additâ, appellatio tribui non nisi serò potuit, cum Romanus Pontifex *Bonifacius VIII* ipso sæculi *XIII* fine ^(d) in decretali *Anagniæ* data *XII Kal. Octob.* anno Pontificatus sui primo, Christi *MCCLXXXV*. nominet tantum quatuor Ecclesiæ, scilicet Latinæ, Doctores egregios, *SS. Augustinum, Ambrosium, Hieronymum, & Gregorium*, quorum festos dies officio, ut ajunt, duplici celebrari præcipit. *Ecclesiæ Doctores, Ecclesiarum Magistri* multi vocati sunt, atque ipse *S. Leo*, si tamen auctor est operis *de vocatione omnium gentium*, a *Gelasio I. Romano Pontifice* vocatur ^(e) *Magister Ecclesiæ*, & in Concilio quinto ^[f] inter *Sanctos Patres, & Doctores Ecclesiæ*, cum aliis multis numeratur; sed *S. Leo*

(c) Cic. de nat. D. l. 1.

[d] Vid. Od. Rayn. ad ann. 1295. n. 55. & Decret. c. un. de Rel. & vener. SS. in VI.

[e] Tract. 3. inter Concil. Labb. tom. 4. p. 1249. D. quo loco perperam ad marginem appositus est Augustinus pro auctore libri de vocatione omnium gentium, cujus verba refert Gelasius.

[f] Conc. V. Collat. 3. edit. Hard. tom. 3. p. 71. A & Labb. tom. 5. p. 435. B.

Leo vel *Doct̃or* nullâ voce aliâ additâ, vel etiam *Doct̃or Chri-
stianitatis* quando dici potuerit non video. Præterea no-
ta $\overline{\text{CD}}$ valde dubito sitne accipienda pro littera M, quæ
vergentibus in barbariem Gothicam sæculis sic efformaba-
tur $\overline{\text{CD}}$; posset etiam accipi pro CO aut CD. Denique ille
verborum ordo, *Apostolicæ Pontifex* seu *Pastor Ecclesiæ*, cujus
temporis esse potuerit non assequor.

Vir harum rerum æstimator peritissimus, ad quem
ea de re scripseram, suspicabatur laminam marmoream
S. Leonis Romani Pontificis hoc nomine primi temporibus
reperitam cum duabus prioribus lineis longè antea scriptis,
additamque tum fuisse tertiam, quâ indicaretur LEO I^{us}
DOCT̃or XrISTianitatis Anno CDXL ASSumptus Pontifex ECcle-
siæ. Sed quoniam præter cetera, quæ possent opponi, non
XL. ut ille suspicabatur, sed VI. manifestè legitur, ingenium
& interpretandi solertia laudari debet, ipsa interpretatio
pro vera suscipi non potest.

Singula conjicendo percurrere non vacat: Sed XI $\overline{\text{I}}$
de Christo, aut Christiano malim interpretari, quàm de
Xisto. Nam & in libris græcis manu exaratis, & in num-
mis posteriorum Imperatorum Græcorum, ^(g) imò & Ducum
Venetorum sæpe legitur $\overline{\text{IC}} \overline{\text{XC}}$ pro IHCOYC XPICTOC.
In aliis, quos ab eruditissimo Bandurio non fuisse obser-
vatos arbitror, scribitur ex una parte $\overline{\text{IC}} \overline{\text{XC}}$, ex altera
 $\overline{\text{IS}} \overline{\text{XS}}$. Nummus æreus secundæ formæ in musæo nostro
habet Christi sedentis protomen, dextrâ elatâ benedicen-
tis ritu, & sin. tenentis Evangeliorum librum, $\overline{\text{IC}} \overline{\text{XC}}$.
pars averfa has litteras habet: ^(b) $\overline{\text{IS}} \overline{\text{XS}}$ BASIL BASILE.

Jesus

(g) Vid. Bandurii tom. 2. p. 712. in Michaele Rhangabe. p. 738. in Joanne Zimisca &c. Et ad cal-
cem hujus §. pag. 20. n. 10. 12. [b] Pag. 20. n. 15.

Iesus Christus Rex Regum. Quid quod & latinè in *libris antiquis sic per abbreviaturam, ut loquimur, repræsentatur secundum diversos casus, XPS, XPI, XPO, XPM*, ut advertit Matthias Martinius⁽ⁱ⁾; & vulgo scribimus PAX XI pro *pax Christi*.

Dum hæc prælo mandarentur, Vir Illustrissimus Franciscus Mariani Bibliothecæ Vaticanæ Scriptor & Basilicæ Vaticanæ addictus, suas de tertia illa linea conjecturas obtulit Eminentiss. Cardinali Camerario, quas ego libenter hoc loco subjiciam, ut quoniam nihil ipse comminisci potui, quod vel mihi probaretur, saltem lectoribus proponam, quæ alii peritiores adinvenere, & quæ possint vel probari viris eruditis, vel eorum certè ad melius aliquid excogitandum industriam acuere. Non credit ille vir subactò ingenio, & in antiquarum inscriptionum ænigmatibus dissolvendis exercitato, harum litterarum sensum esse, LEO I^{us} DOCTOR. XISTus Martyr VI^{us} A Sancto Petro Ecclesiæ rector, tum quia S. Sixtum Martyrem sextum à S. Petro Ecclesiam rexisse nullâ ratione dici potest, neque fatis probabiliter error ejusmodi in quadratarium refundi; tum quia hinc videretur effici, illâ capsulâ contineri ossa non tantum FLAVII CLEMENTIS Martyris, sed etiam Romanorum Pontificum Leonis, & Sixti, seu Xisti, quorum tamen sacras reliquias constat in Basilica Vaticana conditas esse. Igitur probabilius omnino statuit sic explicari hæc posse: LEO I^{us} DOCTOR XISTI, seu Christi Concilium VI^{um} Auctoritate Sancti Petri EGIT. Et verò Concilia plurima fuisse à S. Leone Romæ celebrata Cardinalis Baronius^(K) advertit, illisque temporibus *moris fuisse annis singulis a. d. III. Kal. Octobris convenire Romam Episcopos ad Synodum celebrandam*. Quare cum S.

Leo

(i) Lexic. Philol. & Chr. Jus. (K) Ad annum 449. n. 145. & 149.

Leo Sedem Apostolicam tenuerit annos XXI. minùs diebus duobus & triginta, ^[1] fieri sanè potuit, ut sextum suum Concilium Romanum in S. Clementis Papæ & Martyris antiqua Basilica celebraret, ac tum reperto FLAVII CLEMENTIS Martyris tumulo, ejus Concilii memoriam eodem lapide consignari vellet, cui Sancti Martyris nomen ascriptum erat. Certè in illa S. Clementis Basilica Romanus Pontifex Zozimus, annis tribus & viginti priusquam S. Leo Sedem Apostolicam obtineret, Cælestium Pelagii discipulum audierat, ^(m) & fraudulentâ versipellis hæretici, qui se ^[n] generaliter Innocentii Episcopi litteris consentire, & quædam esse dumtaxat, de quibus se adhuc dubitare, & instrui velle affirmabat, professione deceptus, eum aliquanto leniùs quàm superior postulabat Ecclesiæ disciplina, tractaverat. Sed acceptis deinde ex Africa litteris, in qua provincia ejus aliquanto calliditas evidentiùs innotuerat, vidit optimus Pontifex, non sufficere quòd se generaliter Innocentii Episcopi litteris consentire fatebatur, sed apertè eum debere anathematizare quæ in suo libello prava posuerat; ne, si id non fecisset, multi parum intelligentes magis in libello ejus illa fidei venena à Sede Apostolica crederent approbata ... quàm emendata propter illud, quòd se Papæ Innocentii litteris consentire ipse responderat. Itaque profectò quidquid interea leniùs actum est cum Cælestio, servatâ dumtaxat antiquissimæ & robustissimæ fidei firmitate, correctionis fuit clementissima suasio, non approbatio exitiosissima pravitatis. Et quod ab eodem Sacerdote postea Cælestius & Pelagius damnati sunt, paululum intermissæ, jam necessariò proferendæ ratio severitatis fuit, non prævaricatio priùs cognitæ, vel nova cognitio veritatis, ut scribit S. Augustinus. ^[o]

Alter vir summo ingenio, sagacitate in ejusmodi rebus

B

in-

(1) Baron. ad ann. 461. n. 3. & alii.

(m) Conc. Labb. t. 2. p. 558. E.

(n) S. Aug. l. 2. ad Bonif. c. 3. n. 5.

[o] Videt. de pecc. orig. c. 6. n. 7. &c.

incredibili, & eruditione singulari præditus ita legendam esse tertiam lineam suspicabatur. LEO I^{us} DOCTOR *Xristi* 13. Mensis VI.ⁱ Ad S. Petrum Eundem Gestavit. Verùm si hæc foret tertiæ lineæ sententia, longè seriùs, & quidem ab homine valde imperito eam scriptam esse oporteret. Nam præter illud, quod de Leonis Primi appellatione diximus, illæ, quæ vocantur cifræ arabicæ, qualis est hæc 13. non ante sæculum XII. à Latinis usurpatæ sunt. Deinde non ad S. Petri, sed ad S. Clementis Papæ & Martyris Basilicam gestatum est corpus hujus FLAVII CLEMENTIS Martyris, cui apposita est hæc inscriptio.

Pars averfa legenda est, vel *Christus Jesus DOMINUS*, vel *Deus Optimus*, seu *Omnipotens*, vel etiam *DOMINATUR*, ut jam à tempore Constantini ob triplicem victoriam ope Sanctæ Crucis à se visæ reportatam, hanc epigraphen, IHCOYC XPICTOC NIKA., *Jesus Christus vincit*, tribus Crucibus impositam narrat Nicephorus: ^(p) *Ad imitationem igitur, ac memoriam triplicis istius visionis, tres ex ære fieri curavit Cruces, eisque sacra hæc imposuit nomina, Jesus, Christus vincit; Quo loco μνήμων fortasse, non μίμησις, memoriam, non imitationem à Nicephoro scriptum est, quamvis vox eadem bis eodem capite recurat, atque ante Nicephorum Eusebius, aliique idem scripserint. Neque enim viderat Constantinus tres Cruces, in quarum una scriptum esset IHCOYC, in altera XPICTOC, in tertia NIKA., sed ter Crucem viderat, omen triplicis victoriæ adversus Maxentium, Byzantinos & Scythas, quemadmodum Nicephorus aliique narrant; atque ut perpetuum extaret grati ac pii animi monumentum, eas tres Cruces erexerat,*

quæ

(p) I. 8. c. 32. κατὰ μίμησιν τοίνυν τῶν τριῶν τέπων σταυρικῶν ὁρασέων, ἥεις ἐν χαλκῷ ἐποίησε σταυροὺς, καὶ τὰ σεβάσματα τῶν ὀνόματ' ἕως ὠνόματεν, Ἰησοῦς, Χριστός, Νικῆν.

quæ hujus sententiæ, *Jesus Christus vincit*, singulas voces exhiberent. Eadem epigraphæ sic expressa in nummis pluribus apparet, non tantum in Græcis, sed etiam in Siculis posteriorum temporum, quibus nummis inscriptæ sunt ex vna parte litteræ Græcæ IC XC NIKA *Jesus Christus vincit*, ex alia litteræ arabicæ, vel potius, ut ego quidem jam existimo, florem quoddam ornamenti genus. Nummos ejusmodi aliquos vidi, & unum habeo, ^(q) diversum ab eo, quem refert Paruta. ^(r)

Ac primum, hoc quod vocant monogramma XP , solum Christi nomen exhibet duabus prioribus græcis litteris inter se connexis XP, ut Eusebius totidem verbis docet, quæ mox afferemus. ^[s] Scio Romæ plures id sic interpretari, *Pro Christo*, quasi P littera latina sit, non græca. Quare & hoc Martyrum indicium esse volunt, quo declaratur eos, quorum tumulo inscriptum est, *Pro Christo* sanguinem fuisse. Verum hoc quidem loco P græca littera est, non latina, ut jam pridem Viri docti monuerunt, neque hoc signum solis Martyribus, sed Christianis quibuslibet apponi consuevit. Id verò probant inscriptiones plurimæ, quæ memorantur ab Aringho, ^[t] a Raphaele Fabretto, ^(u) ab eruditissimis Boldeto, ^[x] Ciampino ^(y) et aliis. Accedunt vetera numismata Christianorum Imperatorum, quæ idem signum exhibent vel labaro præfixum, vel in ipsa area ^(z) DN LIB SEVERUS PF AUG Cap. cinctum diad. conv. sin. R. Christi monogramma intra cor. laur.

B 2

In

[q] Pag. 20. n. 10. 11. (r) Sicil. tab. p. 156. Edit. Panorm. (s) L. 1. Vita Const. Cap. olim 25. jam 31. $\delta\upsilon\omicron\varsigma\ \sigma\omicron\iota\chi\epsilon\acute{\iota}\alpha\ \tau\acute{\epsilon}\varsigma\ \chi\rho\iota\varsigma\tau\acute{\omicron}\varsigma\ \pi\alpha\rho\alpha\delta\eta\lambda\epsilon\upsilon\tau\alpha\ \delta\upsilon\omicron\mu\alpha\ \&c.$

(t) Rom. Subterr. t. 2. l. 6. c. 22. & 23. p. 491. &c. [u] Inscr. ant. c. VIII. p. 545. &c.

[x] Osservazioni sopra i Cimiterj de SS. Martiri l. 2. c. 3. p. 337. col. 1. (y) Vet. mohim. p. 1. pag. 225.



[z] Vid. Mediobarbam, Cangium, Banduri, & alios nummorum veterum collectores, & Baronium ad ann. Chr. 312. n. 24. &c. Lips. de Crucl. 3. c. 15. p. 106. &c. Grefser. de Cruce t. 1. l. 2. c. 35. p. 458. c. 39. p. 471. & tom. 3. l. 1. c. 4. p. 1797.


In imo RM. quinarius est argenteus in Musæo nostro . Ibidem verò præter argenteum Anthemii nummum optimæ notæ , & extra omnem falsitatis suspicionem , qualem D. Anselmus Banduri ^(a) nullum vidit , qui legitimus ipsi videretur , est hic aureus , & quidem cum epigraphe singulari , quam simili typo conjunctam in Anthemii nummis hætenus nemo retulit . DN ANTHEMIUS PF AVG. protome Imperatoris hastam humero & manu d. sustinentis , sin. clypeum. R. ^(b) SALUS REIPUBLICAE. in area Christi monogramma intra cor. laur. In imo COMOB.

Cernitur aliquando pro Christi monogrammate sola littera X , quâ & Christi nomen designari solebat , ut demonstrant illæ vulgares Christianorum Antiochenorum de Juliano Apostata querelæ , quibus , ut Julianus ipse refert in Misopogone ^(c) , littera X Christum , K Constantium significat , qui nimirum Cæsarem ipsum creaverat , ut eodem loco profitetur Julianus , & Ammianus ^(d) distinctè tradit , non Constantinum , ut aliqui contra manifestam Juliani mentem interpretantur .

Præterea sunt in M. N. & passim occurrunt Theodosii Senioris , & Arcadii , Honoriique nummi cum epigraphe , GLORIA ROMANORUM , & VIRTUS EXERCITI , & Magnii Maximi VICTORIA AUGG , qui pro Christi nomine aut monogrammate , solam hanc litteram X præferunt inscriptam labaro . Quare & Christum intelligi debere manifestum est in illo Crispi numismate ex maximo

(a) Tom. 2. pag. 594. (b) Pag. 20. num. 14. (c) Jul. tom. 2. pag. 80. edit. Par. 4. 1630. p. 89. τὸ χῖ , φησὶν , ἐδὲν ἠδίκησε τὸ πόλιν , ἐδὲ τὸ Κάππα... ἐδιδάχθημεν ἀρχαῖς ὀνοματίων εἶναι τὰ γράμματα , δηλῶν δ' ἐθέλειν τὸ ἓν χριστὸν , τὸ δὲ Κωνσταντῖον... ὅτι πολὺν τῷ χῖ , πόδος δὲ ὑμᾶς εἰσεσι τῷ Κάππα. (d) L. 15. Vid. Baron. ad an. 355. n. 80. 81.

mo modulo, quod retulit Baronius^(e) ex Musæo Fulvii Urfini, ac deinde Gretserus.^[f] Nummus autem eximius est ejusmodi: CRISPUS NOB CAES. caput Crispi cinctum diademate conv. dextr. extat pectore tenus. Ipse d. expandit, sin. gerit scipionem consularem, in cujus apice est aquila. R. SALUS ET SPES XR PUBLICAE. *Salus & Spes Christi Reipublicæ*. Christus sedens inter duos Juvenes paludatos stantes & hastis innixos, quos Crispum ipsum & Constantinum Juniorem esse verisimile est, dextrâ elatâ benedictis ritu, sin. gerit crucem. In ima parte SP. Nimirum ut Anthemius,^(g) Aelia Flacilla, aliique Augusti, & Augustæ Christi nomine salutem Reipublicæ, Constantius, Magnentius, Decentius salutem suam contineri professi sunt, ita Crispus in eodem salutari nomine, & Christianæ fidei professione *Salutem & spem Reipublicæ* positam esse declarat. Est hodie hoc singulare numisma Romæ in thesauro Borghesiano, ad quem Fulvii Urfini selecta numismata devenerunt, & bonâ fide à Baronio accuratè descriptum est. Itaque frustra Vir eruditissimus Anselmus Banduri qui illud nusquam vidit, suspicatur sic legi debere, SALUS ET SPES REI-PUBLICAE. Idem censet hîc exhiberi Constantinum ipsum sedentem inter filios duos Crispum, & Constantinum Juniorem; sed vultus limbo ornatus persuadet Christum potius esse, quàm Constantinum. In nummo Justiniani argenteo est^[h]  paulo diversâ formâ; In Arcadii nummis æreis aliisque,⁽ⁱ⁾ ; atque ita passim scriptum reperias in veteribus monumentis, quæ afferuntur à Baronio^[k] & Boldeto.^(l)

Extat & hac formâ,^(m)  in nummis Focæ, Siconulfi,


(e) *Ad ann. Chr.* 324. n. 13. 14. 15. 16. (f) *Tom. 3. de Cruce* l. 1. c. 8. p. 1813. (g) *Pag.* 20. n. 14.

[h] *Pag.* 20. num. 4. (i) *Id.* num. 5. [k] *Ad ann. Chr.* 312. n. 25. &c. (l) *Pag.* 336. 352.

[m] *Pag.* 20. num. 6.

nulfi, & aliorum sive Imperatorum, sive Principum, quo signo non pedum pastorale à veteri lituo derivatum exprimitur, ut Begerus⁽ⁿ⁾ aliique vulgò docent, sed ipsum Christi monogramma rudiùs, ut temporibus illis, expressum. Alibi reperitur efformatum ad eum modum quem ænea nostra tabula repræsentat. [o]

Præterea idem Illustrissimus Boldetus^(p) scribit hoc Christi monogramma sæpius à se repertum fuisse in cœmeterio S. Agnetis cum litteris SPES DEI ita dispositis, ut littera P simul esset & latina littera P, & græca littera Π.

Quod verò adjungit^(q) vidisse se in cœmeterio Jordani idem monogramma cum litteris SPES IN DEO, me admonet esse in M.N. nummum tertiæ formæ plumbeum, qui caput virile præfert sine epigraphe, & ex parte averfa has litteras ita tribus versibus distinctas:  quapropter hunc nummulum à Christianis cufum esse oportet.


Denique in marmore quod ex veterum Christianorum tumulis ablatum in manus meas devenit, sic efformatum est Christi monogramma, [r] ut pars litteræ Π sit eadem & litteræ Χ mediumque sit inter Α & Ω, appositâ eâ Sacræ Crucis formâ, quæ Græca dicitur, & palmâ, quâ certum martyrii indicium contineri vir harum rerum peritissimus & à nobis sæpe laudatus Marcus Antonius Boldetus^(f) ostendit. Ita designatur Christum esse rerum omnium principium & finem, Α & Ω, quo se nomine Christus ipse^(t) appellavit. Isto ergo signo non *Pro Christo*, sed ipse *Chri-*

[n] Thef. Brand. tom. 2. par. 857. [o] P. 20. num. 7. 8. 9. [p] Pag. 336.

[q] P. 806. col. 1. (r) N. 3. [f] Osserv. sopra i cim. de SS. Mart. p. 241. &c.

[t] Apoc. 1. 8. XXI. 6. & XXII. 13.

Christus indicatur, neque P eo loco latina littera est, sed græca.




Hoc quidem re-
ctè vidit scriptor ille
à Catholica religione
alienus, & dicacitatis
quàm veritatis stu-
diosior, qui suum iter
Italicum gallicè datis
ad amicum epistolis
descripsit. ^(u) Sed i-
dem cùm in res no-
stras curiosius inqui-
rere nititur, addit his
litteris quæ ad Beatif-
simæ Virginis Mariæ
imagines appositæ vi-
suntur, $\overline{MA} \overline{\Theta R}$, si-
gnificari $\overline{MAPIA} \overline{\Theta TTA-}$
 \overline{THP} , quo nihil dici
potest obtusius. Pri-
mùm enim non mo-
dò in picturis statuif-
que, sed & in pluri-


bus Imperatorum Græcorum nummis, qui decimo, &
consequentibus sæculis cusi sunt, non $\overline{MA} \overline{\Theta R}$, sed \overline{MP}
 $\overline{\Theta R}$ aut $\overline{MP} \overline{\Theta R}$ aut $\overline{MP} \overline{\Theta R}$ legitur; ^[x] deinde mani-
festum est, & Catholicis rudioribus notissimum, his lit-
teris

[u] *Voyage a' Italie* to. 2. lett. 26. p. 13. edit. 1694.
in *Josua ne Conzreno* &c.

(x) N. 13. Vid. & R. D. Banduri tom. 2.

teris significari perpetuam Ecclesiæ Catholicæ fidem in Concilio Ephesino declaratam, quâ B. Virgo Maria Θεοτόκος, & μήτηρ Θεῷ, *Deipara* seu *Mater Dei* creditur, non θυγάτηρ, *filia*, quæ vox idoneum hoc loco sensum nullum potest efficere.


Verum ut ad Christi monogramma redeam, idem hoc signum etiam ante Christi tempora fuit adhibitum in monumentis veteribus ad ea verba significanda, quæ primas litteras Græcas habent X & P. Sanè in uno qui penes me est, Ptolemæorum Ægypti Regum nummo moduli maximi videtur id, quod & Gretserus ^(s) vidisse se testatur in uno ex Bibliotheca Ingolstadiensis Academiæ, quodque in altero viderat Abrahamus Ortelius, nimirum inter duos Aquilæ pedes expressum idem monogramma , quo nihil aliud indicari poterat, quàm Χαλκίδος Ρόδων, *æs Rhodiorum*, ut eruditissimus R. P. Harduinus ^[z] suspicatur, vel ut alii existimant, priores duæ litteræ, quibus Monetarii nomen indicatur, *Chrysauri*, *Chrysanthii*, aut certè civitas aliqua sive in Ægypto, sive in insula Cypri, sive in reliqua ditione Regum Ægypti sita, in qua cusi ejusmodi nummi fuerint, vel etiam Χρυσήπιον, *oraculum χρυσαιοπέδης*, quod fuit Jovis apud Carese pithetum, χρέμης, *Chremes*, viri nomen ex Comædiis notum, χρηστός, *bonus*, aut aliquid simile. ^(a)


Affirmat quidem Joannes Baptista Cafalius ^[b] idem signum  in plerisque Ptolemæorum æreis numismatibus non semel extare, auctoremque affert Pignorium. ^[c] Ego qui signum illud vix in centenis quibusque nummis Ptolemæorum semel

(s) Tom. 1. de Cruce l. 2. c. 38. p. 469. [z] Ad Plin. l. 5. c. 31. sect. 36. num. 23. pag. 285.

(a) Vide Gretserum, Boldetum locis citatis, & alios quos illi adducunt.

(b) De veteribus Christianorum ritibus c. 2. p. 11. (c) Epist. 24.

mel reperi, non audeam affirmare in plerisque Ptolemæorum æreis numismatibus non semel extare. Justus quoque Lipsius ^[d] Occonem secutus scribit in aliquibus nummis Gallieni, & illius Romuli, qui Maxentii filius fuit, signum idem occurrere, quod quia mihi videre non contigit, nec dicere audeo, nec prorsus negare. Certius est id quod ostendunt & Cangius in utroque glossario, & R. P. Bernardus de Montfaucon in Palæographia Græca, ^(e) signum hoc in libris atque adeo in aliis monumentis veteribus sumi pro Χρυσόμομος, Χρόνος, Χρυσός, Χρυσίον aliisque vocibus simile principium habentibus. Est in Collegio Romano concha patula paulo grandior, quam R. P. Josephus Lusi ex patria sua Cephalenia detulit, iis coloribus picta, qui antiquam Græciæ Christianæ pietatem magis quàm elegantiam redolent. In ea stat S. Joannes Chrysostomus medius inter S. Basilium & S. Gregorium, trium horum Ecclesiæ Græcæ Doctorum ac Patrum nominibus in hunc modum ascriptis, Ο ΑΒΑCΙΑΕΙΟC. Ο ΑΓΓΕΛΟC  ΕΛΟΘ. Ο ΑΓΡΗΟΠΙΟC.

Præterea quod inter eruditos jam plerique faciunt, ut quæ videntur inter legendum notatu digna, hoc signo ad libri oram apposito ΝΒ fecernant, Grammatici Græci veteres hoc signo  distinguebant, quo indicarent esse illa Χρησά, seu Χρήσιμα, bona, utilia, digna quæ exciperentur, & in γνωμολογίας, quas & Χρησима-δείας vocabant, subinde referrentur. Ejusmodi Χρησима-δειών libros quatuor ab Helladio Besantino scriptos Photius commemorat in Bibliotheca, ^[f] quos libros ut à Photio ad nos pervenerunt, Jacobus Gronovius in Thesaurum Antiquitatum

C

Græ-

(d) De Cruce l. 3. c. 16. p. 109.

(e) P. 276. & 344.

(f) Cod. 279. p. 1577.

Græcarum ^(g) transtulit. Legerat Photius ^[b] & Procli
 χρησμοδιάν γραμματικὴν, & laudantur ab eruditis excerpta quæ-
 dam ex Geographia Strabonis eodem nomine insignita,
 Χρησμοῦθαι ἐν τῶν Στράβωνος γεωγραφικῶν. Nam à Græcis dicitur
 χρησμοῦθαι & Χρησμοδιά, ut φιλοῦθαι & φιλομαθία. Et Isidorus
⁽ⁱ⁾ agens de notis sententiarum, hanc notam vocat χρήσιμον, eam-
 que sic describit: ✕ χρήσιμον. Hæc sola ^(k) ex voluntate uniuscu-
 jusque ad aliquod notandum ponitur.

Iidem verò Grammatici veteres, quos arbitrabantur
 versus malos, spurios & obelo dignos, quam vocem vel
 antiquatam, vel nimis novam & insolentem, litterâ X
 solâ signabant, atque hoc ipsum vocabant χιάζειν, decussare,
 quemadmodum proditum est Athenienses, ut suum ad-
 versus Chios odium testarentur, litterâ X signasse num-
 mos eos quos adulterinos ac rejiciendos putabant. Qua de
 re consuli possunt Scholiastæ veteres Sophoclis & Euripi-
 dis, Eustathius in Homerum, Henricus Stephanus in The-
 sauro Græco, ^[l] Guillelmus Budæus vel Robertus Con-
 stantinus in Lexico Græco-Latino, Matthias Martinius
 in Cadmo Græco Phænice, & alii.

Notam utramque Josephus Scaliger non satis aptè
 distinxit: X, inquit, ^(m) hæc littera frequentissima est in scholiis
 Pindari & Aristophanis, ubi aliquid à Poeta novè usurpatur. Si-
 gnificabat etiam Χρῆσιν, quando appositum margini notabilem locum
 aut sententiam ostendebat, ut Eclogarius haberet paratum cùm usus
 postularet. Unde & sententiæ selectæ vocantur χρησμοῦθαι. Latini
 lau-

(g) Tom. X. pag. 951. (h) Cod. 239. p. 991.

(i) L. I. O. ig. c. 20. (k) Fort. Sigla. (l) Tom. 2. col. VII.

(m) Anim. in Chron. Euseb. 1. edit. p. 111. B.

laudabilia *dixerunt*. Nam X significabat voces nimium vel novas vel antiquas, atque ideo fugiendas, & sententias notabiles, seu *laudabiles*.

Sed in monumentis certè veterum Christianorum, quale hoc nostrum est, & nihil aliud quàm Sacrum Christi nomen exhibere meritò creditur. Atque hoc quidem signo priores tantum duas Sacri nominis litteras exprimi clarè scribit Eusebius: ^[n] ἡ σωτηρίας ἐπιγορίας τὸ σύμβολον, δύο σοι-
χῆια τῷ Χριστῷ παραδελῶντα ὄνομα διὰ τῶν πρώτων ὑπεσήμενον χαρακτήρων,
χιαζομένους τῷ P κατὰ τὸ μεσαίτατον. Quæ verba sic Henricus Vale-
sius reddidit: *Salutaris appellationis signum: duæ videlicet litte-
ræ nomen Christi primis apicibus designabant, litterâ P in medio sui
decussatâ*. Postremas voces D. Anselmus Banduri sic in-
terpretatur: ^[o] *lineâ transversâ per mediam litteram P ductâ*,
Eusebiumque vult ita scripsisse non de monogrammate
& Sed de P. Verùm pace viri eruditissimi dixerim, Eu-
sebii verba de forma & potius quàm de P intelligenda
videri, tum quia illa & prior fuit & ævo Constantinia-
no sæpius adhibita, tum quia vox ipsa χιαζομένη illam po-
tius quàm hanc significat. Gretserus Eusebii sensum his
verbis explicat: ^[p] *Erat enim P in medio litteræ X curiosè &
subtiliter intexta*.

Fuerunt tamen qui hoc monogrammate non tantum priores duas litteras, sed omnino sex illas quibus Sacrum Christi nomen constat, repræsentari censerent; litteras sex dico, non septem, quia *sigma* seu *sigmata* duo vocis ΧΡΙΣΤΟΣ pro uno numerantur. Id explicat diligenter S. Pau-

C 2

linus

[n] In vita Constant. l. 1. cap. olim 25. jam 31.

[o] Numism. tom. 2. p. 250. not. 1.

[p] De S. Cruce Tom. 1. l. 2. c. 37. pag. 458.

linus ille Nolanus in natali S. Felicis undecimo, quem inter Anecdota Latina ex Ambrosianæ Bibliothecæ codicibus eruta primus vulgavit V. Cl. Ludovicus Antonius Muratorius. ^(g)

Jam verò **HC** est pro **IHC** seu **IHCOYC**, *Jesus*, quod nomen Sanctissimum etiam hodie scribitur à Latinis **IHS**, litterâ latinâ **S** græcæ **Σ** vel **C** substitutâ, & servatâ litterâ **H**, quæ Græcis est **η**, Latinis **h**. Quare licet aliquando scribatur **ihs** & **ihs**, littera media græca est, non latina, quemadmodum diximus in Christi monogrammate **Χ**, litteram **P** græcam esse, non latinam. In antiquis Græcorum Imperatorum, aliorumque ut vidimus, nummis ^(r) vulgò **IC** **XC** vel **IS** **XS** pro **IHCOYC** **XPICTOC** sumitur. Latini ut **XPS**, **XPI**, **XPO**, **XPM** scripsere pro *Christus*, *Christi*, *Christo*, *Christum*, sic & **IHS** & **IHV** pro *Jesus* & *Jesu*. Refert vir harum rerum studiosus indagator Joannes Mabillonius ^[f] sigillum Caroli Calvi cum hac epigraphe **IHV NATE Dñ CARLUM DEFENDE POTENTER**.

DO videtur hic poni pro **DO**minus, quæ appellatio Christi propria est in Sacris litteris. ^(t) *Benedictus Deus & pater Domini Nostri Jesu Christi*. Si quis *Deus Omnipotens* vel *Deus Optimus* significari malit, cum sit eadem sententia, non valde repugnabo. Vir eruditus legendum hic censebat, *Christus hic dominatur*, vel etiam *Christus hac*, nimirum *Cruce docet*, aut *dominatur*. Quæ lectio si magis arriserit, libenter patiar amici optimi & doctissimi, quem plus
amo







(g) Anno 1697. In 4. tom. I. p. 42.

(f) Suppl. Diplom. c. XI. p. 48.

(t) 1. Petr. I. 3.

[r] Pag. 20. n. 10. 12. & 15.

amo plurisque fieri volo quàm me ipsum, conjecturam anteponi meæ.

4.  5. 
6.  7. 
8.  9. 



12. $\overline{\text{IC}} \overline{\text{XC}}$ 13. $\overline{\text{MP}} \overline{\text{OT}}$



§. II.

QUO TEMPORE POSITA FUERIT HÆC

I N S C R I P T I O.

DE tempore quo posita est hæc inscriptio, quoniam nisi conjectando differi non potest, conjecturæ trahendæ sunt vel ab iis quæ plumbeâ illâ capsulâ concludebantur, vel à ductu ac formâ litterarum, quibus exarata est inscriptio. Ab ipsis verbis elici posset aliquid certius, si ea quibus constat tertia linea, quænam sint fuisset affecuti.

I. Ac primò continebat capsula præter cineres & ossa Martyris, Cruces, & Agnos cereos.

Crucis Dominicæ salutare signum, vel in ligno vel in ære expressum, dubitari non potest quin jam tum à primis Christianæ rei temporibus à Fidelibus adhibitum fuerit; neque verò illud in templis tantum atque Oratoriis quò vulgò conveniebant, sed in domibus privatis religiosè asservabatur. Imò & ^(u) *Cruces quoque Fidelibus inhumatis fuerunt inditæ*, ut multis idoneis auctoribus Panvinus asserit; honorem verò his Crucibus habitum satis probant quæ eruditè congefferunt Justus Lipsius ^[x] & Jac. Gretferus. ^(v)

Agni cereæ imagini, quam *Agnum Dei* vocant, eamdem prorsus antiquitatem tribuere non ausim. Onuphrius Panvinus ^[z] Agnorum Dei consecrandorum usum indutum à Romanis Pontificibus fuisse credit ad retinendam memoriam solemnis baptismi, qui primis Religionis Christianæ sæculis solo Paschæ & Pentecostes tempore peragebatur; atque adeo non invaluisse eam consuetudinem ante sæculum nonum, quo ferè sæculo desit solemnis ille baptismus celebrari. Verum hæc conjectura parum est probabilis, cum Agni cerei usum longè antiquiorem esse ostendant multa, quæ Panvinus ipse protulit antiqua monumenta, & apertè conficiat vel solus ordo Romanus, ^(a) qui S. Gregorii Magni aut etiam Gelasii Primi Papæ temporibus adhibebatur, & longè antea confectus censebatur. In illo enim agitur de agnorum cereorum benedictione, & distributione.

Quare

(u) Onuphr. Panvin. de Baptism. Pasch. p. 148. (x) De Cruce In 8. edit. Antwerp. an. 1595. [y] De S. Cruce to. 1. l. 2. p. 344. & seqq. [z] De Baptismate Paschali in 8. 1656. [a] Biblioth. PP. Lugd. to. 13. pag. 700. B. Vid. & Amalarii Fortunati de divin. offic. l. 1. cap. 17. & Baron. & Spondan. ad ann. 58. n. 30.

Quare omnino rectius sentire videntur vel Molanus, ^(b) qui Agni cerei primordia refert ad ætatem Constantini Magni, hoc est ad sæculum Christi quartum, vel etiam Augustinus Valerius Cardinalis Veronensis, ^(c) alique quos recenset Theop. Raynaudus, ^(d) qui ejus usum referunt ad S. Joannis Chrysostomi, aut Zozimi Papæ tempora, sive ad initium sæculi quinti.

Neque tamen ego eo præsertim tempore institutam Agnos cereos consecrandi consuetudinem fuisse contendo, quam longè antiquiorem esse, imò & ab Apostolica traditione proficisci ^(e) facilè mihi persuadeo, etsi vel auctores satis idoneos, vel satis valida deesse videam argumenta, quibus idem aliis persuadeam. Ita neque illæ Cruces, neque cereæ illæ imagines agni quidquam prorsus afferunt, quo veluti certo indicio inscriptionis hujus tempus deprehendamus.

Nam quod cereos Agnos ossibus permistos, & eâdem capsulâ plumbeâ inclusos Eminentissimus Cardinalis reperit, sæpius idem contigisse Scriptores probati tradidere. Neque enim tantùm Alberto Magno ^(f) consepultus est Agnus Dei cereus, quem ille vivus piè ac religiosè gestans venerabatur, sed etiam in eo, ^(g) qui Romæ anno 1544. effossus est, tumulo Mariæ Augustæ illius quæ Honorii Imperatoris conjux fuit, & Stilichonis filia, reconditus erat præter cetera Agnus Dei cereus. Rem totam retulit ille Sebastianus Munsterus rituum nostrorum alioquin defer-

(b) *Orat. 6. de Agnis Dei.* (c) *De benedictione agnorum Dei. Libellus ejus editus est cum Onuph. Panv. libro p. 165.* (d) *Tom. 2. p. 57. n. 119. & to. 10. c. 8. p. 344. & c. 13. p. 374. & c.* (e) *Vid. librum Italicè scriptum Vincentii Bonardi O. P. discorso intorno all' origine, antichità, e ritù de gli Agnus Dei Benedetti. In 4. Roma 1586.* [f] *Tb. Rayn. T. 10. p. 373.* (g) *Ib. p. 347. & 348.*

fertor & contemptor. ^(b) Eamdem narrant Bartholomæus Marlianus ⁽ⁱ⁾ & Laurentius Surius. ^(k) Mariam verò Augustam ante sæculi quinti medium mortuam esse constat.

2. Progrediamur jam ad litterarum formam & implicationes. Video litteram E veluti in arcum esse lunatam hac forma ϵ , quod Latini videntur à Græcis nonnisi ferò didicisse.

Ac Græci quidem litteram E rectâ, & quadratâ formâ primis temporibus vulgò scribebant, pariterque sigma non aliâ formâ quàm Σ . Deinde paulatim induci cœpit ϵ pro E; & C, aliquando etiam Γ pro Σ . Nam utriusque litteræ eadem ferme fuit ratio, easdem utraque fortunæ consuetudinisque vices experta est,

Usum scribendi ϵ pro E, & C pro Σ Syria primùm, ut videtur, deinde Ægyptus atque Asia, postea circa Domitiani tempora Græcia, Græcæque passim urbes reliquæ susceperunt. Itaque & post Domitianum in veteribus nummis Trajani, Hadriani, imò & Gordiani Pii forma E & Σ non quidem omnino nunquam, at certè perrarò cernitur, ^(l) & in nummis qui Domitiani ætatem aliquot sæculis antecesserunt, forma ϵ & C nonnisi parcè ac rarò, sed interdum tamen usurpata est. Qua in re non temporis tantùm, quod hæctenus Eruditi Viri fecere, sed regionis ac ferme urbis cujusque usus observandus fuit.

Jam in nummos latinos forma ϵ pro E longè seriùs inducitur. Ac mihi quidem videtur etiam in posterioris ævi nummis qui litteras vel per aream sparsas, vel in ima parte quam *exergon* vocant, collocatas exhibent, forma E litte-

(b) *Cosmogr. Univ.* p. 148. edit. Basl. (i) *L. 5. de ann. Urb.* c. 22. (k) *Comm. ann.* 1544.
[l] *Vid. Ez. Spanb. tom. 1. edit. Lond. diff. 2. p. 100. & 101.*

litteram latinam, **E** Græcam exhibere. TRE, *Treveri*; ESIS, *quintum Sisciæ*. In Honorii nummo ex ære minimi moduli, qui est in musæo nostro, DN HONORIVS PF AVG. Caput cinctum diademate ex duplici unionum ordine, conversum sinistrorsum. **Æ**. VRBS ROMA FELIX. In area OF **E** *officina quinta*. Imperator stans tenet d. vexillum, sin. Victoriolam quam respicit, & à qua coronatur. In imo SMROM *Sacra Moneta Romæ*. Atque aliorum qui passim occurrunt, eadem solet esse ratio. Seriùs omnino, & quidem non semper occurrit in vocibus latinis **E** pro E. Est in m. n. nummus hic aureus Theodosii Junioris: DN THEODOSIVS PF AVG. Caput adversum & galeatum Imperatoris d. tenentis hastam supra humerum, sin. clypeum. **Æ**. VIRT EXERC ROM. Imperator stans tenet sin. trophæum quod humero gestat, d. premit caput captivi. Ad sin. stella; in imo CONOB. Hanc epigraphen eruditissimus & diligentissimus D. Anselmus Banduri non observavit, ^(m) præterquam in Juliani nummis.

Quod verò de nummis veteribus dixi, de inscriptionibus idem affirmari potest, formam **E** posteriorum esse temporum in monumentis latinâ linguâ exaratis, ac ferè Justiniani & Justini Imperatorum ætate cœpisse vulgò à Latinis hominibus adhiberi. Itaque quantum possum assequi conjecturâ, forma litteræ **E**, quam habet nostra inscriptio in **CÆ** & in **EV**, facit ut arbitrer nonnisi post sæculum VI. aut VII. ipsam esse exaratam; ductus verò litterarum accuratus & elegans persuadet non multò post sæculum VII. esse scriptam.

Accedit quod idem suadent illæ litterarum implica-

D

tio-

tiones in **FAVS** & **CEM**. Nam litterarum quidem compendia **V** pro **TV** atque hujusmodi cetera jam tum à Romanæ reipublicæ temporibus usurpari cœpere. Est in m. n. nummus gentis Aciliæ argenteus, in quo scriptum est : **NN ACILIVS III VIR VALE V** pro *valetudinis*. Verùm litterarum implicationes, quibus efficiuntur ea quæ vocantur monogrammata & siglæ, à Græcis libenter adhibitæ, non tamen in vocibus quibuscumlibet, sed in propriis ferè urbium aliquarum nominibus designandis, seriùs à Romanis receptæ sunt. Caput muliebre turritum conv. fin. cum epigraphe **FELIX RAVENNA** \mathfrak{R} . in area **RE R**avenna. Nummus est æreus infimi moduli in m. n. quem nummum circa Justiniani aut certè Focæ Imperatoris tempora cūsum esse multa persuadent. Justiniani pariter ac Justiniani nummi plures argentei ex m. n. litteras exhibent inter se commissas & connexas eo modo, qui ante illam ætatem vix adhiberi solebat.

Jam quæ de nummis veteribus diximus, potiori jure debent de inscriptionibus intelligi. Rectè enim advertit Christophorus Cellarius, ^[n] *angustum spatium in parvis nummis fuisse in causa, ut litteras quasdam artifices contraherent & ligarent, quod secus se in lapidibus ac æneis tabulis habet, ubi omnia plerumque sunt planè distinctèque expressa.*

Igitur illæ litterarum implicationes cū à Latinis seriùs adhibitæ fuerint, quàm à Græcis, seriùs deinde ac rariùs in inscriptionibus quàm in nummis, neque in nummis latinis appareant ante sæculum sextum septimumve, omnino suadent inscriptionem hanc ante sæculum septimum positam non fuisse, præsertim cū ex ceteris omni-

[n] *Ortk. lat. p. 18. edit. Patav.*

omnibus quæ capsulâ plumbeâ continebantur, nihil sit quod persuadeat prius fuisse positam, nihil quod eo sæculo poni non potuerit.

Dum vetus altare subrueretur, extractum est marmor, quo pars ejus anterior claudebatur, longum pedes circiter quatuor Regios, seu palmos Romanos sex, altum duos pedes cum dimidio, sive palmos ferè quatuor. Id ab exteriori parte politum ac lævigatum, ab interiori signatum erat inscriptione optimis characteribus exaratâ, quæ quamvis ad inscriptionis nostræ cognoscendam ætatem non multum faciat, tamen hoc loco videtur proponenda, tum quia nusquam est edita, tum quia ad illustrandam illius perantiquæ Basilicæ historiam conferre poterit.

HH ISRAELITICVS DŌ^(o) OFFEREBAT POPVLVS RVRI

ALIVS QVIDEM AVRVM ALIVS NAMQVE ARGENTVM.

QVIDAM COQVE^[p] ÆS QVIDAM VERO PILOS CAPRARVM

INFELIX AVTEM EGO GREGORIVS PRIMVS PBR^(g) ALMÆ

SEDIS APOSTOLICÆ HVIVSQVE TITVLI^(r) GERENS

CVRAM AC BEATI SVPREMVS CLIENS CLEMENTIS

OFFERO DE TVIS HÆC TIBI XRE^[f] THESAVRIS

TEMPORIBVS SCISS^(t) ZACCHARIÆ^[u] PRÆSVLIS SVMMI

PER MARTYREM ET SCM^[x] PARVA MVNVSCVLA TVVM

CLEMENTEM CVIVS MERITIS MEREAR DELICTISCARERE

ATQVE AD BEATAM ÆTERNAM INGREDI VITAM

AISTI QVANTVM HABES REGNVM VALET CAELORVM

D 2

SV-

(o) Pro Domino (p) Pro quoque (g) Pro presbyter (r) Scilicet S. Clementis (f) Pro Christe
(t) Pro Sanctissimi (u) Nomen Romani Pontificis Cruce signatum. [x] Pro Sanctum.

SVSCIPE HOS DÑE^(y) VELVT MINVTA VIDVÆ QVÆSO
 VETERISNOVIQVE TESTAMENTORVM DENIQVE LIBROS
 OCTATEVCHVM REGVM PSALTERIVM AC PROPHETARUM
 SALOMONEM ESDRAM^(z) STORIARVM ILICO PLENOS

REQVIRE SYLLABARVM LECTOR SEQVENTIAM HARVM

Sedecim primi versus eo modo distincti erant, quo in distichis exscribendis distingui versus hexametri & pentametri solent, quamvis in his nulla aut fanè perexigua versuum latinorum ratio appareat. Qui verò sequitur versus, *Require syllabarum lector sequentiam harum*, & minutiori characterē scriptus erat, & non video quī potuerit ad hanc inscriptionem referri, in qua *syllabarum sequentiam* omni ope ac studio *requisisse* me, & nihil extundere potuisse fateor, licet per acrostichidas & alias ejusmodi difficiles nugas sæpius ierim. Suspicio igitur hunc versum pertinuisse ad alteram quamdam inscriptionem subjectam, quæ tota cum aliqua hujus versiculi parte truncata est, cum marmor ex eo Basilicæ loco, in quo primū positum fuerat, ablatum, atque ut altari tegendo inserviret, dissectum est.

Gregorius hujus inscriptionis auctor tituli S. Clementis presbyter Cardinalis Zachariæ Romani Pontificis ætate, jam tum à Gregorii secundi temporibus interfuit Romano Concilio,^(a) quod celebratum est Nonis Aprilibus, Leonis Isauri Imperatoris anno sexto, post Consulatum ejus anno pariter sexto, & Constantini Novi ejus filii anno secundo, Indictione quarta, qui characteres indicant
 an-

[y] Pro Domine [z] Pro historiarum
 pag. 1458. E. Hrd. t. III. p. 1868. A.

[a] Baron. ad ann. 721. Conc. Labb. tom. VI.

annum æræ Christianæ DCCXXI. Quapropter , ut rectè Severinus Binius & Baronius adverterunt , Surius hanc Synodum ad Gregorii III. tempora transferre non debuit. Cùm enim Theophanes scribat Constantinum Novum , eum Sacrarum Imaginum osorem qui & Copronymus dictus est , ipso Paschatis die Indictione tertia creatum esse Imperatorem , annus ejus secundus idemque Leonis patris sextus incidit in Indictionem quartam , qui fuit annus Gregorii Secundi Summi Pontificis octavus, Christi DCCXXI. In eo Concilio post aliorum multorum & Episcoporum & Presbyterorum S. R. E. Cardinalium nomina scriptus reperitur *Gregorius humilis Presbyter S. R. E. tituli S. Clementis*.

Idem Gregorius II. alia duo Concilia Romæ celebrasse fertur annis DCCXXIV & DCCXXVI. & Gregorius III. hujus successor alia duo Romæ celebravit annis DCCXXXI. & DCCXXXII. præsertim adversus Iconoclastarum hæresim eo tempore grassantem ; quorum Conciliorum licet subscriptiones interciderint , dubitari non potest quin iis pariter Gregorius tituli S. Clementis S. R. E. Presbyter adfuerit. Verùm in Concilio Romano, quod Zacharias Summus Pontifex coegit anno Christi DCCXLIII. ^(b) Gregorius hic noster recensetur post Episcopos & Joannem Archipresbyterum. Denique in altero Zachariæ Concilio anni DCCXLV. ^(c) scriptus est pariter post Episcopos & Joannem Archipresbyterum *Gregorius humilis Presbyter S. R. E. tituli S. Clementis*.

Quod ait Gregorius , populum Israeliticum *ruri*, hoc est

(b) Baron. ad ann. 743. n. 24. Conc. Labb. tom. vi. pag. 1551. A. Hærd. t. III. pag. 1931. B.

(c) Baron. ad ann. 745. Conc. Labb. t. vi. p. 1562. D. Hærd. tom. III. p. 1941. C.

est in deserto, dum peregrinaretur & quasi *rusticaretur*, atque in terram promissam tenderet, obtulisse Domino aurum, argentum & æs, & pilos caprarum, alludit ad id quod Dominus Mosi præceperat, ^(d) *Hæc sunt autem quæ accipere debetis: aurum, & argentum, & æs, hyacinthum & purpuram, coccumque bis tinctum, & byssum, pilos caprarum & pelles arietum rubricatas, quæ omnia ab Israelitis oblata deinde memorantur.* ^(e)

Inter libros quos offert Deo Gregorius, *Octateuchum* appellat, nempe libros quinque Mosi, librum Josue, librum Judicum, & librum Ruth. Nimirum ut Pentateuchi nomine libri quinque Mosi intelligi solent, ut S. Augustinus alique Heptateuchum vocarunt libros quinque Mosi, librum Josue, & librum Judicum, ita Gregorius Octateuchi appellatione libros octo designavit, addito scilicet ad Heptateuchum libro Ruth, qui liber mole perexiguus vel libro Judicum adjungi solebat, quia completitur id quod contigit ^(f) *In diebus unius Judicis, quando Judices præerant*, vel libris Regum, quia & à Samuele scriptum eum librum esse plerique existimant, & quædam est ad libros Regum & Davidicæ stirpis historiam veluti præfatio. Quanti autem pretii fuerint hi Sacri codices, colligi potest ex iis quæ passim narrantur de ingenti pecunia, quæ libri manu exarati commutari solerent ante vulgatam artem typographicam.

Elucet verò in ea inscriptione Gregorii S. R. E. Cardinalis erga S. Clementem pietas, quam nimirum vir Sanctissimus, & Sacro Cardinalium Collegio dignissimus sui muneris esse existimavit, ut eo præsertim tempore testaretur,

[d] Exod. xxv. 3, 4. [e] Ibid. xxxv. 5, 6, 7. (f) Ruth. I. I.

retur , quo Summi Pontifices & Conciliis sæpius habitis , & Decretis & Epistolis novos hæreticos Iconoclastas aut ad antiquam Ecclesiæ fidem revocare nitebantur , aut si id consequi non possent , feriebant anathemate , & ab Ecclesiæ communione sejunctos esse declarabant . Hæc enim perpetua fuit Romanorum Pontificum consuetudo , ut hæresum novarum vel auctores vel studiosos ac fautores tandiu blandè clementerque tractarent , dum spes aliqua foret eos ab infania posse hac ratione retrahi ; quod si ex sententia non succederet , caverent certè diligenter , ne illorum qui sanari nollent , morbus alios inficeret , & dira per incautum vulgus contagia serperent . Hunc dignum supremo Ecclesiæ capite sensum exprimit S. Innocentius hujus nominis primus epistolâ ad Patres Concilii Carthaginensis : ^[g] *Avellendi sunt longiùs , & ab Ecclesiæ procul removendi visceribus , ne diu inultus multa occupans , insanabilis post error increascit . Si enim diu sub hac fuerint impunitate versati , necesse est multos in hanc suæ pravitatem mentis inducant , decipiantque innocentes vel potiùs imprudentes , qui fidem catholicam sequuntur . Putabunt enim eos rectè sentire , quos adhuc viderint in Ecclesia perdurare . Separetur ergo à sano corpore vulnus insanum , remotoque morbi sævientis afflatu , cautiùs quæ sunt sincera perdurent , & grex purior ab hac mali pecoris contagione purgetur . Eundem Ecclesiæ Catholicæ usum S. Augustinus pluribus locis declaravit , maximè verò Epistolâ ad Hilarium , primis hæreseos Pelagianæ temporibus conscriptâ : ^(b) *Plures sunt , quàm sperare possumus , & ubi non redarguuntur , etiam alios ad suam sectam seducunt , & sic crebrescunt , ut nesciam quò sint erupturi . Nos tamen malumus eos in Ecclesiæ compage sanari , quàm ex illius corpore velut insanabilia membra**

(g) Epist. inter Aug. 181. olim 91. n. 8. & 9. [b] Ep. 157. olim 89. c. 3. n. 22.

bra refecari , si tamen hoc permittat ipsa necessitas . Timendum est enim ne plura putrescant , dum putribus parcitur . Sed jam redeamus ad monumentum Gregorii S. R. E. Presbyteri Cardinalis tituli S. Clementis .

Quoniam hæc inscriptio posita est *temporibus Sanctissimi Zachariæ Præsulis Summi* , cùm Gregorius ipse foret *Primus Presbyter* , seu Archipresbyter *Almæ Sedis Apostolicæ* , necesse est positam eam fuisse inter annum Christi DCCXLV. quo nondum Gregorius , sed adhuc Joannes erat S. R. E. Archipresbyter , & annum DCCLII. quo Zacharias Papa decessit die XV. Martii .⁽ⁱ⁾ Post annos verò multos quàm posita est inscriptio Gregorii in aliqua insigni Basilicæ parte , rerum humanarum fato translatus est ipse lapis ad altaris fabricam , atque ita quidem , ut pars scripta quæ priùs antica erat & patebat , postica fieret , omniumque oculis eriperetur , ac fuisset porro perpetuæ oblivioni & tenebris tradita , nisi eam eximia Eminentissimi Cardinalis Camerarii ANNIBALIS ALBANI pietas ad memoriam hominum lucemque revocasset . Quod verò huic lapidi contigit , ut ad alium alio tempore usum adhiberetur , sæpe contigisse videmus etiam in Christianorum cœmeteriis , in quibus aliqui lapides ex altera parte profanæ superstitionis , ex altera religionis Christianæ monumentis consignati sunt .

Dixi Gregoriani hujus lapidis translationem multis post ipsius Gregorii mortem annis factam esse , cùm scilicet extrueretur illud altare quod jam dirutum , & magnificentiori apparatu restitutum est ; sed idem tamen opinor eam de qua potissimum instituta est hæc disputatio ,

FLA.

[i] Baron. ad ann. 752. n. 6. & alii.

FLAVII CLEMENTIS Martyris plumbeam capsulam jam ante Zachariæ Romani Pontificis tempora sub altari priori fuisse positam.

§. III.

QUIS SIT FLAVIUS ILLE CLEMENS, CUJUS

MEMORIÆ DICATA EST HÆC INSCRIPTIO.

Augustinus Oldoinus Societatis JESU eo libro,^(K) quem Clementi X. Pontifici Maximo inscripsit de Clementibus titulo sanctitatis vel morum sanctimoniâ illustribus, memorat Clementes numero septem & quadraginta, & de singulis exscribit, suisque animadversionibus illustrat ea quæ probati Auctores litteris mandavere. Ex his omnibus duo tantum sunt, ad quos pertinere nostram hanc inscriptionem suspicari possimus, Clemens Papa hujus nominis primus, & T. FLAVIUS CLEMENS vir Consularis & Domitiani patruelis, uterque Martyr, hic Domitiano, ille Trajano Romanum Imperium tenente.

Ac primum quoniam hæc inscriptio reperta fuit in antiquissima S. Clementis Papæ & Martyris Basilica, quibusdam fortasse videbitur ad ipsum S. Clementem Papam satis commodè referri posse.

Neque verò dubitandum est, quin ille Christi Martyr fuerit, præsertim cum S. Hieronymus ineunte sæculo quinto afferat ^(l) Rufini verba, quibus appellatur *Clemens*

E

Apo-

(K) *Perusie* 1675. In 4. (l) *Apol. adv. Ruf. l. 2. p. 160. C. 1. 2. Edit. Rom. 1576.*

Apostolorum discipulus, qui Romanæ Ecclesiæ post Apostolos Episcopus & Martyr fuit; eundemque S. Doctor pluribus ante annis inter Scriptores Ecclesiasticos retulerit cum hoc elogio:

^(m) *Obiit tertio Trajani anno, & nominis ejus memoriam usque hodie Romæ extructa Ecclesia custodit; quo uno confici videtur eum Martyrem fuisse illis temporibus habitum. Neque enim aliorum ferè quàm Martyrum nomini Tempia, Ecclesiæ, Basilicæ, Memorix dicabantur. Deinde non levis sanè momenti est, quòd in Sacro Missæ Canone, quem longè antiquissimum esse nemo negaverit, Clemens inter Sanctos Martyres appellatur. Præterea Zozimus Romanus Pontifex cùm anno Christi 417. ad Africanos Episcopos scriberet de Cælestii Pelagiani causa, quam ut diximus, habito conventu in S. Clementis Basilica cognoverat, Clementem Martyrem Christi fuisse, & fidem quam didicerat & docuerat, martyrio consecrassè pronuntiat his verbis: ^[n] die cognitionis resedimus in Sancti Clementis Basilica, qui imbutus Beati Petri Apostoli disciplinis, tali magistro veteres emendasset errores, tantosque profectus habuisset, ut fidem quam didicerat & docuerat, etiam martyrio consecraret. Zozimi sententiam ac fidem, seu potius famam existimationemque communem & vulgatam sequuntur Patres Concilii primi Vasensis anno 442. celebrati, dum S. Clementem Pontificem Romanum vocare non dubitant ^(o) *Beatum Martyrem*. Jam nullus profertur omnino ante nostram ætatem scriptor, qui distinctè negaverit eum Martyrem fuisse. Audaciores igitur quàm par est illi Critici ^[p] putandi sunt, qui nullo satis idoneo fundamen-*

to,

^(m) *Catal. script. Eccles. t. 1. p. 174. A. edit. Rom. 1576.*

^[n] *Concil. Labb. t. 2. p. 1558. E.*

& in app. tom. x. operum S. Aug. PP. Bened. pag. 98. E.

^(o) *Can. v. 1. Concil. Labb. t. 111.*

p. 1458. A. & Hird. t. 1. p. 1788. D.

^(p) *Tillelm. mem. Eccl. tom. 2. p. 1. art. 5. & not. XII.*

Sur S. Clement. Baillet Vies des SS. 23. nov. &c.

to, & contra constantem ac minimè dubiam priorum sæculorum fidem ad nos certis monumentis transmissam vel dubitant, vel prorsus negant S. Clementem Papam hujus nominis primum vitam pro Christo dedisse, ac meritò ab Ecclesia Romana Sanctis Martyribus annumerari. ^[q]

Sed quamvis id quidem in dubium vocari nolim, non tamen prorsus omnia præstare audeam, quæ temporum posteriorum Scriptores de ejus martyrii loco, ratione, miraculisque narrant. Omnino rectè J. B. Sollerius ad Martyrologium Ufuardi, quod summâ eruditione & incredibili diligentia illustratum edidit, monuit ^[r] *plurima in Clementis gestis, ætate, exilio, scriptis seu veris seu supposititiis enodanda superesse*. At illi certè Scriptores in Cherroneso Taurica, non Romæ mortem pro Christi fide S. Clementi Romano Pontifici allatam esse consentiunt; neque ullus est Scriptor paulo antiquior, imò ne recentior quidem, qui eum Romæ passum esse confirmet. Quidquod & ejus reliquæ nonnisi post annos plures in urbem translatae dicuntur, scilicet labente sæculo nono, sedente Romæ Nicolao I. vel Hadriano II. Summo Pontifice; & S. Hieronymus eo quem modò protulimus loco scribit *nominis ejus memoriam Romæ custodiri*, corpus Sacrasve Reliquias Romæ suo tempore fuisse non scribit. Sunt etiam qui dubitent, an unquam ejus corpus Romam sit delatum, quod postremum dum probare conatus est Philippus Rondininus erudito opere, ^(s) summo studio & magno labore nondum tamen perfecit, ut hominibus quales hodie vivunt, paulo magis difficilibus ac morosis omnes dubitandi causas

(q) Vid. P. Honoré de S. Marie Regles de la crit. t. I. part. I. diff. 2. p. 127. &c.

(r) Ad diem XXIII. Nov. inter acta SS. Junii tom. VII. pag. 694.

(s) De S. Clemente ejusque Basilica Romæ 1706. In 4.

amoveret. Neque verò res ejusmodi certis documentis Scriptorum veterum auctoritate nixis & quasi consignatis tabulis probari aut possunt aut debent. Equidem non modò Ecclesiæ Romanæ, quæ omnium Ecclesiarum mater & magistra est, fidem pluris facio quàm cetera omnia, sed etiam Ecclesiæ cujuslibet sententiam à Majoribus profectam, argumentis ut ajunt negantibus facilè antepono, atque adeo non dubito quin aliquæ S. Clementis Papæ & Martyris Sacræ Reliquiæ in antiqua Basilica ejus nomini consecrata servantur.

Omitto Clementem Pontificem, non Romanum, sed Judæum ab aliquibus ^(t) credi. Nam id quidem levissimâ conjecturâ suspicati videntur, cùm primum sit eum his temporibus Judæum appellari potuisse, & se Jacobi filium profiteri, qui licet non Judæus esset gente, tamen Christianus foret, ac Judæorum, scilicet Apostolorum fuisset discipulus. Sic enim, ne ab iis in quibus sumus, temporibus recedamus, Dio scripsit id quod nonnisi de Christianis potest intelligi, ^(u) multos à Domitiano morti addictos ideo fuisse, quòd ad Judæorum instituta deflexissent. Errant illi multò magis, cùm ajunt eum qui Judæus foret, *Flavium* dici non potuisse. Neque verò ego Papam Clementem *Flavium* fuisse credo; sed etsi maximè verum esset Clementem Romanum Pontificem fuisse Judæum, non obstaret quominus *Flavius* diceretur, quod nomen Josephus ille Judæus Judaicarumque rerum scriptor eadem ætate gessit. Præterea non magis alienum esset ab homine Judæo *Flavii* nomen, quàm à Græco. Atqui non longè
ab

[t] Tillelm. mem. tom. 2. De S. Clem. art. 1. pag. 270.

[u] L. 67. p. 166. A.

z) ἄλλοι ἐς τὰ τῶν ἰεραίων ἦδη ἐξορέλλοντες πολλοὶ κατεδικάσθησαν.

ab illis temporibus *Titi Flavii Clementis* nomen habuit ille sanctitate non minùs quàm sacrarum & profanarum litterarum scientiâ clarissimus presbyter, Pantæni discipulus & Origenis magister, qui à munere quod Alexandriae gessit Alexandrinus dici solet. Hujus enim Stromata, ut Eusebius ^[*] ac Photius ⁽¹⁾ testantur, nomen præferunt *Τίτῃς Φλαβίῃς* vel *Φλαουίῃς Κλήμεντος*, *Titi Flavii Clementis*.

Equidem Clementem Papam civem Romanum potius fuisse Faustini filium, ex regione Cælii montis, eâ nimirum ipsâ, in qua Basilica ejus nomini dicata est jam ante S. Hieronymi tempora, veterum Scriptorum ⁽²⁾ auctoritati & ipsi traditioni ac famæ facillè credo. Fuisse verò eundem ex gente Flavia, & Domitillæ Virginis & Martyris, cui sacrum virginitatis velum imposuit, affinem, nonnisi valde incertis vel argumentis vel auctoribus ⁽⁴⁾ creditur.

Et verò prorsus non cohæret quod in Actis SS. Nerei & Achillei non valde antiquis inducuntur illi ad S. Clementem Papam hæc verba facere : ^(b) *Scimus tamen Clementem Consulem patris tui fuisse germanum*. Frater enim T. FLAVII CLEMENTIS Consul non alius memoratur, quàm Flavius Sabinus, quem dum Suetonius ^(c) *alterum ex patruelis* Domitiani vocat, satis indicat non plures fuisse quàm duos : Clementem verò Papam Flavii Sabini illius qui Clementis germanus frater fuit, & uxorem habuit Juliam Titi Augusti filiam Augustam, filium fuisse tam parum simile veri est, si rationem temporum attendamus, ut re-
felli

(*) Hist. Eccl. l. 6. c. 13. p. 214. B. [1] Bibl. Cod. cx1. p. 287. [2] Zosm. Rufin. Gregor. Turon. Missal. Roman. Martyrol. Anastas. Biblioth. in Clemente. [a] Vid. God. Hensch. act. SS. ad diem XII. Maii n. 2. p. 4. tom. III. & J. B. Soller. ad Martyr. Ursardi die VII. Maii tom. VI. Junii p. 256. (b) Ibid. Cap. 2. n. 9. pag. 8. F. [c] In Domit. c. 10.

felli commentum ejusmodi non magnopere necesse sit. Deinde quid opus erat Clementem Papam à patruì consulatu commendare, qui si patruum habuit CLEMENTEM Consulem, commendari veriùs à patris & avi consulatu poterat? Nam Flavium Sabinum bis consulem fuisse & fasti ^[d] docent, & Suetonius ^(e) apertè significat. Hujus verò Sabini pater T. Flavius Sabinus Consul suffectus est Kal. Maiis anni V. C. 822. Chr. 69. ^[f] Jam verò an quispiam alius Clemens, ille v. g. qui consul fastis ascribitur anno V. C. 847. Chr. 94. in Chronico Tironis Prosperi, Clementis Papæ patruus aliquo modo dici possit, an Clemens vocari debeat qui Lateranus dicitur tum in fastis Idatianis, tum in Anonymis editis ab Emin. Norisio, disquirere nihil opus est. Si enim Clemens Papa Domitillæ virginis fuit affinis, quod & Acta illa prædicant, & Henschenius videtur credidisse, Clementem Consulem alium à T. FLAVIO CLEMENTE patruum habere non potuit.

Addi possunt hoc loco ea quæ Franciscus Bivarius ^(g) annotavit: *Fuit alter ejusdem nominis Fl. Clemens S. Petri discipulus, patruus S. Clementis Papæ, & primus in Gallia Metensis Episcopus, qui obiit in pace confessor die XVII. ejusdem Mensis ^(h) cujus Molanus meminit eo die, & vitam scribit Petrus in Catalogo.* ^[i] *Timeo autem ne forsan similitudine nominis ductus, quæ FLAVII CLEMENTIS Martyris sunt, huic Confessori tribuat. Ait enim fuisse Consulem Romæ, ac S. Clementis Papæ patruum.* Alii Clementem Papam Octaviæ gentis fuisse dicunt, auctore in primis S. Eucherio in Epistola ad Valerianum, ^(k) quo loco de S. Clemente Papa scribit his verbis:


(d) Ad ann. V. C. 835. & 837. (e) In Domit. c. 10. & 12. (f) Fasti Pigh tom. XI. antiq. Rom. pag. 219. (g) Comm. In Fl. Dextrum ad ann. 86. p. 176. (h) Novembris. (i) L. 10. c. 113. (k) Tom. 6. Bibl. PP. Edit. Lugd. p. 859. H. Vide Rondin. de S. Clemente l. 1. c. 1. pag. 4.

bis : *Clemens vetustâ prosapiâ Senatorum atque etiam ex stirpe Cæsarium, omni scientiâ refertus, omniumque liberalium artium peritissimus ad hanc Justorum viam transiit, itaque etiam in illa excellenter effloruit, ut principi quoque Apostolorum successor extiterit*. Addunt eo tempore quo maximè fervebat Neronis Imperatoris in Christianos furor, omnesque vel morte plecterentur, vel certè pellerentur urbe quotquot Christo nomen dedissent, Clementi soli, quippe Neronis consanguineo veniam hanc datam fuisse, ut in urbe permaneret.

At sanè Scriptorum antiquiorum nullus Clementem Romanum Pontificem *Flavium* appellavit. Non est igitur is de quo jam agimus, *Flavius Clemens Martyr*, Clemens Papa hujus nominis primus. Deinde si Clemens Romanus Pontifex hic significaretur, non *Clemens Martyr*, sed potius *Clemens Episcopus*, vel *Pontifex & Martyr* appellari debuit. Denique si Clemens Papa Romæ mortuus non est, minùs rectè, ut opinor, diceretur *hic tumultatus*.

Igitur prorsus necesse est, ut *Flavius ille Clemens Martyr*, cujus est hæc inscriptio, sit T. FLAVIVS CLEMENS, qui anno ante Domitiani mortem cum ipso XVII. Consule consulatum gessit, quem annum omnes V. C. 848. Eximius Annalium Ecclesiasticorum parens Christi LXXXVII. Pagius & alii LXXXV. numerant.

Supereft ut de hujus T. FLAVII CLEMENTIS genere, Consulatu & morte pro Christo fortiter tolerata differamus. Ac primùm quæ de illius genere quærimus, fient dilucidiora, si totum gentis Flaviæ stemma, quale fuit ejus temporibus, distinctè proposuerimus.



1. Vespasius Pollio, *ter Tribunus militum Præfectusque castrorum* fuit, ut docet Suetonius, ⁽¹⁾ qui & Vespasiæ gentis splendorem commendat his verbis : *Locus etiam nunc ad sextum miliarium à Norsia Spoletum euntibus, in monte summo appellatur Vespasia, ubi Vespasiorum complura monimenta extant, magnum indicium splendoris familiæ & vetustatis.*

2. Vespasia Polla Vespasii Pollionis filia, mortuo si-

ne

(1) In Vesp. cap. 1.

ne liberis , ut suspicari pronum est , fratre , quem fuisse *Senatorem prætoriae dignitatis* Suetonius ^(m) affirmat , Vespasîæ domus sola hæres fuit , atque ideo ab ejus nomine filius Imperator Vespasianus cognomen accepit , ut T. Flavius à patre , Vespasianus à matris nomine diceretur . De ea nihil admodum Historici narrant , nisi quòd Vespasianum filium ad capeffendos magistratus reluctantem impulit . Is enim , ut narrat idem Suetonius , ^[n] *Sumptâ togâ virili latum clavum , quamquam fratre adepto , diu averfatus est , nec ut tandem appeteret , compelli nisi à matre potuit . Ea demum extudit magis convicio , quàm precibus vel auctoritate , dum eum identidem per contumeliam anteambulonem fratris appellat .*

3. Flavius Liberalis *Ferentini* genitus , nec quidquam amplius quàm *Quæstorius scriba* fuit . ^(o)

4. Flavia Domitilla Flavii Liberalis filia , ^[p] *Statilii Capellæ equitis Romani* provincialis , nempe *Sabratensis ex Africa olim delicata* , mox ubi ingenua & civis Romana recuperatorio judicio pronuntiata est , Vespasiani uxor fuit . Neque verò Flaviam eam dictam fuisse quisquam putat , quòd Flavii Vespasiani uxor foret , sed quòd Flavii Liberalis filia . Hæc autem prima est ex quatuor illis feminis , quæ nomen idem hac ætate gesserunt , obiitque antequam Vespasianus imperium adipisceretur , relictis ex eo liberis Tito & Domitiano , qui postea Imperatores fuere , & Flaviâ Domitillâ , quam pariter Vespasianus ^[q] *adbuc privatus amisit* . Matrem consecravit Titus consulatu suo VIII. eodemque ultimo , ut veteres nummi docent ; reliquarum ejusdem nominis feminarum in nummis quidem veteribus nulla extat memoria .

5. Domitius Corbulo vir fuit bello strenuus, & disciplinæ militaris asper etiam usque ad severitatis famam exactor, cujus res in Belgio, Syria & Armenia præclare fortiterque gestas Dio ^(r) Tacitusque ^(s) narrant. Is Neronis jussu è Syria evocatus in Græciam & interemptus est, cum illum omnes quibusvis præmiis dignum arbitrentur, ipse dignum se morte fateretur, qui se inermem obtulisset Tyranno.

6. Domitia Longina Domitii Corbulonis filia nupsit Ælio Lamiaë, quem Dio ^(t) L. Lamiam Æmilianum vocat, ac deinde ^[u] à Domitiano in matrimonium abducta est, postea dimissa, mox revocata. Filium habuit Domitianum Cæsarem, & DIVI CAESARIS MATER in nummis appellatur.

7. T. Flavius Petronius *Municeps Reatinus*, bello civili *Pompejanarum partium Centurio* dicitur à Suetonio, ^(x) & uxorem habuisse Tertullam, quæ nepotem Vespasianum educavit in prædiis Cosanis. ^[y] *Ille Aviaë memoriam tantopere dilexit, ut solemnibus ac festis diebus poculo quoque ejus argenteo potare perseveraverit.* Tertullam idem Suetonius intelligit, cum refert, ^(z) nato Vespasiano patrem Sabinum *haruspicio insuper confirmatum renunciaſſe matri, nepotem ei Cæsarem genitum: nec illam quidquam aliud quàm cachinnasse, mirantem quòd adhuc se mentis compote deliraret jam filius suus.*

8. T. Flavium Sabinum T. Flavii Petronii filium, *publicanum & expertem militiæ* fuisse Suetonius ^(a) tradit, quippe qui *publicum quadragesimæ in Asia egerit*, exactor nimirum seu redemptor vectigalis ac portorii illius, quod à Galba de-

(r) *Hist.* l. 60. p. 685. E. & l. 62. p. 710. A. & c. [s] *Annal.* l. 11. & 13. *Hist.* l. 2. cap. 76.

(t) L. 66. pag. 746. A. [u] *Suet. in Domit.* c. 1. & *Dio* l. 67. p. 759. E.

(x) *In Vesp.* c. 1. [y] *Ibid.* c. 2. (z) *Ibid.* c. 5. (a) *In Vesp.* c. 1.

deinde remissum esse veteres nummi testantur hac epigraphe : QUADRAGENS . REMISSAE , & REMISSAE XXXX. & XL R. Titus Fl. Sabinus uxorem duxit Vespasiam Pollam, de qua jam diximus, ^(b) Vespasii Pollionis filiam, ex qua liberos suscepit T. Flavium Sabinum, & T. Flavium Vespasianum Imperatorem.

9. T. Flavius Sabinus T. Fl. Sabini & Vespasiae Pollae filius, T. Fl. Sabini, de quo agemus postea, ^(c) Plautillae, & nostri T. FL. CLEMENTIS pater, dum Vitellio Romanam rem tenente Praefectus Urbis, ut scribit Tacitus, ^(d) Vespasiani fratris absentis partes Romae tuetur, compulsus in templum Jovis Capitolini, & eo succenso à Vitellianis oppressus est. ^(e) Idem videtur hoc ipso anno V. C. 822. Christi LXIX. Consul fuisse suffectus Kalendis Maiis, quibus, ut alibi diximus, fasti Pighiani ^[f] docent suffectos Consules fuisse Caelium Sabinum, & Titum Flavium Titi filium Titi nepotem Sabinum. Fuisse illum Vespasiani fratrem natu grandiore apparet, tum ex eo quod Suetonius ^(g) narrat de quibusdam ostentis in ejus ac Vespasiani ortu; tum quia ipse patris, Vespasianus à matre derivatum cognomen accepit, quemadmodum ferme Vespasiani filii duo, major Titus Vespasianus à patris nomine, minor ab uxoris Domitiae nomine Domitianus postea dictus est; tum denique quia latum clavum diu ante fratrem gessit, ut supra auctore Suetonio ^(h) diximus.

10. T. Flavius Vespasianus Imperator, alter T. Flavii Sabini & Vespasiae Pollae filius, natus est, ut Suetonius ^[i] perhibet, XV. Kal. Decembris, Q. Sulpitio Camerino,

F 2

rino,

(b) Num. 2. [c] N. 17. [d] Hist. l. 3. cap. 64. (e) Sueton. in Vitell. cap. 15.

(f) Editi à Grævio tom. XI. Antiq. Rom. ad ann. V. C. 822. [g] In Vesp. c. 5.

(h) In Vesp. c. 2. (i) Ibid.

rino , C. Poppæo Sabino Coss. nimirum anno V. C. 762. Christi IX. exeunte, ^(K) *quinquennio antequam Augustus excederet*. Quare annum expleverat ætatis LIX. agebatque sexagesimum, cum imperare cœpit anno V.C. 822. Christi LXIX. ipsis Kalendis Juliis, ut vulgò affirmanti Dioni creditur, seu V. Nonas Julii, ut numerant Eusebius in Chronico, Cassiodorus, Clemens Alexandrinus, & Theophilus Antiochenus à Pagio ⁽¹⁾ memorati. Imperavit Vespasianus annos ferè decem, vixit annos LXIX. menses septem, diesque pariter septem. Nam *extinctus est*, ut scribit Suetonius, ^(m) *VIII. Kal. Julii annum gerens ætatis sexagesimum ac nonum, superque mensem ac diem septimum*, nimirum ab die XVII. Novembris anni V. C. 762. Christi IX. ad diem Junii XXIV. anni V. C. 832. Christi LXXIX. Itaque ad annos Imperii decem absolvendos defuerunt dies sex, si cum Dione imperii ejus initium referimus ad Kalendas Julias, septem si ad V. Nonas Julias cum Eusebio aliisque imperare eum cœpisse dicimus, octo si quod multi faciunt, eum diem quo vivere desiit, non annumeramus.

II. Titus vivo etiamnum patre Vespasiano ascitus est in aliquam Imperii partem, scilicet postquam expugnatâ Hierosolymâ victor Romam rediit; ⁽ⁿ⁾ *neque ex eo destitit participem atque etiam tutorem Imperii agere*. Triumphavit cum patre, Censuramque gessit unâ. Eidem collega & in Tribunitia potestate, & in septem Consulatus fuit. Quare IMPERATOR appellatur in nummis latinis, ΑΥΤΟΚΡΑΤΩΡ in Græcis, & TRIBUNITIÂ POTESTATE CONSUL, & AVGVSTVS & PONTIFEX, & CENSOR. Non tamen rerum potiri, aut AVGVSTVS aut

(K) Petav. de Doctr. temp. l. xi. cap. 16. pag. 326. (1) Crit. in Ann. Baron. ad ann. Chr. 79. p. 72.
[m] In Vesp. c. 24. [n] Suet. In Tito cap. 6.

aut Pontifex Maximus dici cœpit nisi post patris mortem VIII. Kal. Julii anno V. C. 832. Christi LXXIX. imperiumque solus tenuit annos duos, menses duos ac dies viginti, usque ad Idus Septembres anni V. C. 834. Christi LXXXI. Natus erat, ut refert Suetonius ^[o] III. Kal. Januarii insigni anno *Cajanâ nece*, hoc est, ut quidem interpretor, XXX. Decembris anni V. C. 793. æræ Christianæ XL. diebus XXV. antequam Cajus ille quem Caligulam dicunt, periret IX. Kal. Februarias ^[p] V. C. 794. Christi XLI. Atque ita annus quo Titus natus est, *insignis* fuit *Cajanâ nece*, sive quia anno Titi primo Cajus cæsus est, sive quia, ut Petavius ^(q) mavult, labente eodem Urbis anno à Palilibus numero, & Titus natus est III. Kal. Januarias & Caligula cæsus IX. Kal. Februarias. Vixit igitur Titus annos XLI. nimirum non integros, à die XXX. Decembris anni Christiani XL. ad XIII. diem Septembris anni ejusdem æræ LXXXI. quæ est Suetonii ratio: ^(r) *Excessit in eadem, qua pater, villa, Idibus Septembris, post biennium ac menses duos, diesque XX. quàm successerat patri, altero & quadragesimo ætatis anno; his enim verbis, altero & quadragesimo, non annum ætatis XLII. sed XLI. scilicet inchoatum Scriptor latinus designare debuit. Si verò cum Ricciolio ^[f] poneremus Titum natum esse die XXX. Decembris anno V. C. 794. Christi XLI. dicendum esset eum vixisse tantum annos XXXIX. menses octo, dies XIV. quod omnino cum Suetonii verbis non cohæret.*

12. Juliam Titi Augusti filiam, ipsamque *Augustam* nummi prædicant. Matrem ejus Suetonius ^(t) docet fuisse Marciam Furvillam, *splendidi generis* feminam, quam Titus duxe-

(o) In Titoc. 2. [p] Suet. in Calig. c. 58. (q) De Doctr. temp. l. xi. c. 18. p. 328.

(r) In Titoc. xi. [f] Chron. reform. l. 4. c. 8. n. 10. p. 192. & 193. (t) In Titocap. 4.

duxerat post Arricidiæ prioris uxoris mortem, & cum qua, sublatâ filiâ, divortium fecit. Juliam Titi Flavii Sabini uxorem paulo post mariti necem Domitianus non modò *ardentissimè palamque dilexit*, ut scribit Suetonius, ^(u) sed & uxorem duxit, si Philostrato credere malumus, ^(x) Ἰὺλιαν ἡγετο, quàm Tillemontio ^(y) Philostratum erroris accusanti. Julia certè paulopost obiit, atque à Domitiano consecrata est, ut ejus nummi testantur cusi Domitiano XV. & XVI. Consule, annis V. C. 843. Christi XC. & tribus consequentibus.

13. Domitianus Imperator, alter Imperatoris Vespasiani filius, *natus est*, inquit Suetonius ^(z) IX Kal. Novembris, *patre Consule designato, inituroque mense insequenti honorem*, scilicet anno V. C. 804. Christi LI. quo Vespasianus primum consulatum gessit, Consul suffectus ad duos postremos anni menses. Domitianus cœpit imperare post fratris mortem Idibus Septembris anni V. C. 834. Christi LXXXI. cùm antea & Præturam Urbanam & consulatus septem gessisset. Vivere desiit post annos Imperii XV. & dies quatuor, anno V. C. 849. Christi XCVI. ^(a) XIII. Kal. Octobris anno ætatis XLV, scilicet non prorsus completo. Vixit enim, quod Xiphilinus ^(b) ex Dione transcripsit, annos XLIV. menses X. dies XXVI.

14. Domitianus Cæsar Domitiani Imperatoris & Domitiæ Longinæ filius obiit adhuc puer, quippe natus Imperante jam patre, & ante XII. ejus Imperii annum mortuus. Quare in nummis veteribus Domitiæ matris, nonnisi puer apparet jam consecratus & cum DIVI appellatione.

15. Fla-

[u] In Domit. cap. 22. (x) Vit. apoll. l. vii. cap. olim 3. jam 7. [y] In vita Titi.
[z] In Domit. cap. 1. [a] Sueton. In Domit. cap. 17. (b) L. 67. pag. 678. B.

15. Flavia Domitilla Vespasiani Imperatoris & Flaviæ Domitillæ filia ^[c] obiit antequam pater Imperium obtineret. Cui nupserit, Scriptores non prodidere; verum dubitari non potest, quin alterius Flaviæ Domitillæ mater fuerit, quam Domitianus T. FLAVIO CLEMENTI, de quo jam disputamus, in matrimonium collocaverit, ut mox dicemus.

16. Flavia Domitilla illius quam modò appellavimus, Flaviæ Domitillæ filia, prioris Flaviæ Domitillæ & Vespasiani neptis, ipsa est quam T. FLAVIUS CLEMENS duxit uxorem, & quæ post viri necem in Pandatariam insulam deportata est. Eam Xiphilinus seu Dio ^(d) vocat Domitiani συγγενῇ, propinquam vel consanguineam, quo nomine sororem non satis rectè vocaret, sed sororis filiam rectiùs vocare potuit. Quamquam, ut ingenuè fatear, vocem hanc συγγενῇ & ab aliis, & à Dione præsertim usurpatam observavi ad eum designandum, qui frater germanus esset. Sed quod Philostratus in vita Apollonii creditur de Domitiano scripsisse, ^(e) ejus jussu interemptum fuisse CLEMENTEM, cui sororem suam uxorem dederat, Κλήμεντα ἀπεκτονῶς ἀνδρα ὕπατον, ὃ τὴν ἀδελφὴν ἢ ἐαυτὴν ἐδεδώκει, vitio librariorum factum id est, qui ἀδελφὴν pro ἀδελφιδῆν scripsere, ut jampridem eruditi viri judicarunt, atque inprimis Gottfridus Olearius, qui elegantissimam Philostratorum editionem procuravit. ^[f] Et verò vox ipsa ἐδεδώκει, quâ Philostratus utitur, satis indicat non hic agi de Domitiani sorore, sed de sororis filia. Sororem enim Domitiani non Domitianus, sed Vespasianus pater
in

(c) Sueton. In Vesp. cap. 3. (d) L. 67. pag. 766. A. (e) L. VIII. cap. olim 10. jam 25.

[f] L. 1. f. 1. ann. 1709. fol.

in matrimonium collocare debuit, atque adeo collocaverat; verum sororis filiam, ἀδελφιδῆν, præsertim matre mortuâ, Domitianus jure dicitur in matrimonium collocasse, ἐδεδώκει. Atque ita Philostratus Quintiliano consentit, cui Domitianus hujus Domitillæ filios ^(g) sororis suæ nepotes instituendos dederat. Illi enim sororis nepotes, si Quintilianum celeberrimum illis temporibus latinæ linguæ & artis oratoriæ magistrum latinè scripsisse arbitramur, non sanè sunt sororis filii, multò minùs nepotes ex sorore, ut Turnebus ^(b) interpretatur, sed omnino filii sunt ejus, quæ matrem habuit Domitiani sororem. Sororis nepotes vocantur latinè, non qui ex sorore, sed qui ex sororis filio filiâve nati sunt. Ita Suetonius ⁽ⁱ⁾ ac Tacitus ^(κ) Octavium Augustum C. Julii Cæsaris sororis nepotem meritò appellant, quippe qui filius fuerit Acciæ, quæ ^(l) M. Accio Balbo, & Juliâ sorore Caii Cæsaris genita sit. Si verò Philostratus ἀδελφιδῆν scripsit, non ἀδελφιδῆν, nihil superest nisi ut Baronium ^(m) sequamur, qui affirmare non dubitat Philostratum ea in re hallucinatum esse, & nominum similitudine deceptum matrem pro filia nominasse.

17. T. Flavius T. Flavii F. Titi Flavii N. Sabinus, alter ex Domitiani patruelibus, ⁽ⁿ⁾ ut eum Suetonius appellat, nostri T. FLAVII CLEMENTIS frater, & quidem major, ut censet Tillemontius, ^(o) Imperatoris Domitiani jussu occisus est, quòd eum Comitiorum Consularium die destinatum, perperam præco non Consulem ad populum, sed Imperatorem pronunciaisset. Idem videtur esse, quem fasti Domitiano in consulatu gerendo collegam ponunt anno V. C. 835. Chri-

sti

(g) Quintil. Inst. l. 4. prol. (b) Ad hunc locum Quintiliani. (i) In Jul. c. 83.

(κ) Annal. l. 3. [l] Suet. in Octav. c. 4. [m] Ad ann. 98. n. 5. [n] In Domit. cap. 10.

(o) Tom. 2. part. 1. mem. Eccl. edit. Brux. ann. 1695. pag. 224.

AN LXXXII. atque iterum anno V. C. 837. Christi LXXXIV. Mortis causa fuit levissima affectati Imperii suspicio. Quare non dubium videtur, quin de illo sit intelligendum id quod Suetonius ^(p) refert : *Generum fratris indignè ferens albatos & ipsum ministros habere proclamavit*, ἐκ ἀγαθὸν πολυκίρατον, ^(q) *non decet multos imperare*. Is enim Titi gener fuit, atque uxorem duxerat Juliam Titi Augusti filiam, ut jam advertimus, & narrat Philostratus. ^(r) Potuit & causa inferendæ mortis accedere, ut cum Julia licentiùs Domitianus viveret, quam ^(s) *ad hoc virginem oblatam in matrimonium sibi, cùm devinctus Domitiæ nuptiis pertinacissimè recusasset, non multo post alii collocatam ultro corrupit, & quidem vivo etiam tum Tito : mox patre ac viro orbatam ardentissimè palamque dilexit, ut etiam causa mortis extiterit, coactæ conceptum à se abigere*. Quo scelere Domitianus etiam Poetarum ^(t) sales & reprehensionem non effugit.

18. Plautilla T. Flavii Sabini filia, T. Flavii Sabini & nostri T. FLAVII CLEMENTIS soror, Flaviæ Domitillæ Christianæ Virginis & Martyris mater fuit. Eam ab Apostolo Petro fuisse Christianæ fidei præceptis imbutam, ac baptizatam, & anno post S. Petri mortem nondum expleto, die XX. Maii, quo die memoriæ ejus Sacri Fasti celebrant, *in pace vivere desiisse colligitur ex iis actis quæ Bollandistæ referunt* ^(u) *ad diem XX. Maii*. De ea pauca sunt quæ scribit Eusebius.

19. Flavia Domitilla Virgo & Martyr, Plautillæ, quæ FLAVII nostri CLEMENTIS soror erat, filia, ἐξ ἀδελφῆς γεγενῆα φλαβία Κλήμεντος, ut scribit Eusebius ^(x), ab

G

Apo-

(p) In Demit. c. 12. (q) Ex Hom. Iliad. A. (r) Vita Apoll. l. v. 11. cap. olim 3. jam 7.

(s) Suet. in Demit. c. 22. (t) Juvenal. sat. 2. v. 30. &c. (u) Tom. v. Maii p. 172. *

(x) Hist. l. 3. cap. olim 14. jam 18.

Apostolo Petro Christianis Sacris initiata & cum matre simul baptizata est. Hujus memoriam jam ab annis admodum mille agit Ecclesia Romana die VII. & die XII. Maii, tanquam Sanctæ Virginis ac Martyris. Primum enim in insulam Pontiam relegata anno Domitiani XV. ut ex veterum Scriptorum, etiam à religione Christiana alienorum monumentis descripsit Eusebius: ^[1] deinde Trajano Imperante mortem pro Christi fide subiit. Exilii in Pontiam insulam à Domitiano imperati, & cellularum, in quibus Sancta Virgo longum martyrium duxerat, meminit S. Hieronymus ⁽²⁾ epistolâ illâ ad Eustochium, quâ epitaphium Paulæ matris continetur. Cetera quæ ad ipsam pertinent, eruuntur ferè omnia ex actis SS. Martyrum Nerei & Achillei, quibus, ut jam quidem extant, non magnam fidem habent Eruditi, tum quia non videntur nisi aliquot post ejus mortem sæculis aut digesta, aut in linguam latinam translata, tum quia & *dialogismis* inanibus referta, & non paucis præterea Manichæorum erroribus aspersa censentur. Ea edita sunt inter *Acta sanctorum*. ^(a)

Quatuor itaque feminæ sunt in hoc stemmate, quæ idem Flaviæ Domitillæ nomen gesserunt; prima Vespasiani uxor; secunda hujus filia, quæ cui tradita sit in uxorem, deprehendere non potui; tertia secundæ filia & primæ neptis, Christiana & nostri T. FLAVII CLEMENTIS uxor; quarta T. Flavii Sabini neptis, & Plautillæ filia, Virgo & Martyr. De quinta quam aliqui memorant, alius erit differendi locus. Primæ solius extant nummi. Nam is quidem, quem Godefridus Henschenius ex Huberto

(1) *Ibid.* (2) *Tom. 1. epist. 27. pag. 105. A. edit. Rom. ann. 1595.*

(a) *Ad diem XII. Maii tom. 111. p. 6.*

berto Goltzio desumptum sic describit : ^[b] MEMORIAE
 DOMITILLAE DIVI VESP F SPQR *circum speciosissimam*
bigam à duabus mulis protractam , ex altera parte PP IMP
 CAES DOMIT AVG GERM PM TR P III IMP V
 COS X. vel totus fictus est , vel ex aliquo cujus litteræ
 non erant conspicuæ , malè descriptus. Omitto inscriptionem
 si esset vera , sic legi debuisse , ut PP ejus finem ob-
 tineret , non principium. Nummi Domitillæ genuini , qui
 & in m. n. sunt & passim occurrunt , SC percussi , sunt
 omnes ex ære magno , neque caput ejus præferunt , sed
 ex antica parte carpentum à mulis duabus tractum cum
 epigraphe , MEMORIAE DOMITILLAE. Paucos vidi ,
 in quibus legitur DOMITILLAE IMP VES AVG *Impe-*
ratoris Vespasiani Augusti , scilicet uxori. Infra carpentum
 SPQR. In parte averfa scriptum est : IMP T CAES DI-
 VI VESP F AVG PM TRP PP COS VIII cum SC in area.
 Sic & Juliæ Titi filiæ nummus est ex ære magno sine ejus
 capite cum eadem carpenti forma , & epigraphe , DIVAE
 IVLIAE AVG DIVI TITI F. In altera pagina , IMP
 CAES DOMIT AVG GERM COS XV CENS P PP.
 in area SC. Alter similis habet COS XVI. Uterque est in
 m. n. Nimirum Titus matrem , fratris filiam Domitianus
 consecravit.

20. Devenimus tandem ad T. FLAVIVM CLEMEN-
 TEM T. Flavii Sabini filium , T. Flavii Sabini nepotem ,
 atque adeo Vespasiani Imperatoris fratris filium , Titi &
 Domitiani patruelem , qui post gestum cum Domitiano
 consulatum , pro Christi fide , & quoddam Romanorum Deos
 colere nollet , à Domitiano mori jussus est , ejus conjugem

G 2

Fla-

Flaviâ Domitillâ pariter Christianâ in insulam Pandatariam seu Pandariam, quæ in sinu Puteolano sita est, deportatâ. Quæ cum ita sint, & Scriptorum Christianorum exterorumque testimonio certissima, quis non vehementer miretur cum Augustino Oldoino, ^(c) quòd *tanti viri tabulæ Ecclesiasticæ & Martyrologia non meminerint*? Et verò licet Martyrologium Romanum præter Clementem Papam & Martyrem, Clementes alios Martyres tres commemoret, silet planè de hoc nostro, neque quidquam habent Menæa Græca, quod præsertim ad hunc possit referri. Quapropter rectè conjicit Baronius, ^[d] *quòd ejus mentio nulla vel in Martyrologio vel antiquis monumentis habeatur, injuriâ temporum id evenisse, factumque esse, ut si qua ejusdem Clementis nobilissimi Martyris memoria reliqua esset post nostrarum scripturarum Diocletiani tempore facta naufragia, omnes Clementem Romanum Pontificem mente concipientes, unum eundemque nominibus confusis atque personis Clementem esse existimarint.* Hinc adeo factum est, ut cum T. FLAVIVS CLEMENS Vespasiani fratris filius, Titi & Domitiani patruelis fuisse à veteribus Scriptoribus Græcis Latinisque perhibeatur, alii, quod jam observavimus, Clementem Papam Imperatoribus illis ex gente Flavia, alii etiam Neroni consanguinitate propinquum esse crediderint. Et eodem fortasse errore contigit, ut ossa T. FLAVII CLEMENTIS in Basilicam S. Clementis Papæ & Martyris translata sint. Nos tamen quæ possumus quocumque modo de eo disputare pergemus, & tanquam tabulas è naufragio colligere, postquam de ejus filiis disseruerimus, quæ pars nobis postrema restat ad S. Martyris genus explicandum.

21. T. FLAVII CLEMENTIS Martyris & Flaviæ
Do-

(c) *De Clem.* p. 319. (d) *Ad ann. Chr.* 98. n. 7.

Domitillæ filii duo illi sunt, quorum alterum, ut scribit Suetonius, ^(e) *Vespasianum*, alterum *Domitianum* appellari Domitianus jusserat, & successores palàm destinaverat, tradideratque Fabio Quintiliano erudiendos & educandos, quod ipse testatur his verbis : ^(f) *Cùm verò mihi Domitianus Augustus sororis suæ nepotum delegaverit curam*. Scribebat hæc Quintilianus post absolutos tres priores operis sui libros, atque adeo ætatis suæ anno primo & quinquagesimo, Imperantis Domitiani XII. & XIII. V. C. 846. Christi XCIII. ut colligitur ex Annalibus Quintilianeis, ^(g) quos eruditè digessit Henricus Dodwellus. Quid illis deinde factum fuerit, Scriptores non docent. Christianamne fidem amplexi sint, adhortantibus & exemplo præeuntibus patre & matre, meritò dubium est. Quod enim scribit Ludovicus Aurelius Perusinus in Epitome Annalium Baronii, ^(h) de Domitiano : *Flavium Clementem patruelem Exconsulem, & ut quidam tradunt, duos insuper ejus filios, quos jam Cæsares destinaverat, ob Christi fidem mactari jubet* : a quibus id tradatur, nescio; a veteribus Scriptoribus, qui FLAVII CLEMENTIS meminerunt, ipsoque Baronio non tradi scio. At cùm illi per aliquot annos, nempe a XII. ad XV. annum Domitiani summâ apud Imperatorem gratiâ floruerint, atque Imperii successores fuerint palàm destinati, fieri facilè potest, ut alter ille, cui Domitianus Vespasiani nomen dedit, exhibeatur nummo eo singulari, quem primus protulit R. P. Harduinus ⁽ⁱ⁾ ex Musæo R. P. Billerez Soc. Jesu. Æreus est tertii fermè moduli cum Juvenili capite nudo & sin. converso, & epigraphe, ΟΥΕCΠΑCΙΑΝΟC ΝΕΩΤΕΡΟC Κ. ΖΜΤ.

G 3

PNAION.

(e) In Domit. cap. 15. (f) Instit. l. 4. prol. (g) Pag. 117. §. XXI. &c.

(h) Ad ann. 98. p. 94. (i) Oper. Scilicet pag. 733. col. 2.

ΠΝΑΙΩΝ. ^(κ) Victoria gradiens d. tenet d. coronam. *Vespasianus Junior*. *Smyrnæorum* nummus. Atque hunc quidem Vespasianum Juniorem R. P. Harduinus censet filium fuisse Imperatoris Vespasiani, & Domitillæ, quam secundam Vespasiani uxorem fuisse statuit, atque ex eo Flavios Constantinos originem ducere. Verum, si Suetonio ^(l) credimus, Vespasianus ex Domitilla, quæ prima ipsius uxor fuit, quamque *ad hoc privatus amisit*, non alios *liberos tulit*, quàm *Titum & Domitianum & Domitillam*. Itaque Vespasianus ille Junior, si ex secunda uxore natus esset, fuisset filius *Cænidis*, quam *Antoniæ libertam & à manu, dilectam quandam sibi revocavit in contubernium, habuitque etiam Imperator penè justæ uxoris loco*. Laurentius Patarolus æstimator harum rerum peritissimus, qui nummum similem edidit ex Musæo Theupolo, ^(m) eum tribuit Tito, qui vivo patre dictus sit Vespasianus Junior, *νεώτερος*. Et verò quamvis Titi prænomen hic non appareat, quod in aliis plerisque Titi nummis latinis græcisque scribi solet, satis eum secernit à patre *Junioris* appellatio, magis etiam quàm appellatio Titi, quæ nimirum fuit ipsi cum patre communis. Erat enim uterque Titus Flavius Vespasianus; sed Flavii nomen neuter gessit in nummis Romæ percussis, uterque rarò gessit in nummis Coloniarum & Græcarum urbium; Titi verò prænomen ut filio potius quàm patri nummi veteres Scriptoresque tribuerent, non certa ratio, sed usus & consuetudo fecit. Sanè Victoria illa gradiens, quam hic Smyrnæorum nummus præfert, vel in clypeo palmæ appenso scribens, sæpe occurrit in nummis Titi græcis pariter ac latinis.

Qui-

(κ) Hec est in ipso nummo litterarum forma. (l) In *Vesp.* cap. 3.

(m) *Giorn. d'Ital.* tom. 28. p. 310. Vid. & tom. 29. pag. 241.

Quibus tamen minùs placebunt hæ virorum eruditissimorum conjecturæ, videant num illa *Vespasiani Junioris* appellatio tribui possit alteri ex FLAVII CLEMENTIS nostri filiis, quem Domitianus *Vespasianum appellari jusserat*, & *successorem palàm destinaverat*. Alter, cui *Domitiani* nomen fuit, is fortasse est, a quo se oriundum jactabat *Domitius* ille *Domitianus*, *Dux Aureoli fortissimus & vebementissimus*, de quo paucis agit Trebellius Pollio. ^[n]

Explicato T. FLAVII CLEMENTIS genere, quæ de ipso nominatim supersunt dicenda breviter expediemus. Anno præsertim Domitiani XV. qui fuit V. C. 848. Christi XCV. Domitiani furor in Christianos exarsit, ut Eusebius veterum Scriptorum etiam Gentilium auctoritatem secutus docet his verbis: ^[o] *Scriptores quoque a religione nostra alienissimi etiam tempus ipsum persecutionis accuratè notaverunt. Scribunt enim anno principatus Domitiani quintodecimo Flaviam Domitillam, FLAVII CLEMENTIS ejus qui tunc temporis Romæ Consul erat, sororis filiam unà cum aliis plurimis ob confessionem Christi in Insulam Pontiam fuisse deportatam.*

De T. FLAVII CLEMENTIS morte ac martyrio quid Suetonius ^[p] & Dio, ^[q] quid deinde Eusebius Christianique Scriptores referant, tam diligenter, tam eruditè Baronius exscripsit, ut Antonius Pagius nihil repererit, quod vel adjungi posset, vel deberet emendari. ^[r] Suetonius quidem hæc pauca prodidit: ^[s] *Denique FLAVIUM CLEMENTEM patruelem suum, contemptissimæ inertie, cujus filios etiamnum parvulos successores palàm destinaverat, & abolito priore nomine, alterum Vespasianum appellari jusserat, alterum Domitianum,*
repen-

(n) Trig. tyr. c. 11. p. 191. B.

(o) Hist. l. 3. cap. olim 14. jam 18. ἐν ἔτει πεντεκαιδεκάτῳ Διομετιάνῳ &c.

(p) In Domit. c. 15. (q) L. 67. p. 766. A. (r) Ad ann. Chr. 96. Baronii 98. [s] In Domit. c. 15.

repentè ex tenuissima suspitione tantum non ipso ejus consulatu interemit. Quo maximè factò maturavit sibi exitum. Quòd Suetonius CLEMENTEM contemptissimæ inertiae accusat, ideo facit, ut egregiè Baronius^(t) advertit, quòd Christiani tranquillioris vitæ cupidi ac proinde pacifici, urbanos strepitus ac Palatii ac Curiarum tumultus vitare solerent. Vetus enim ac frequens hæc erat in Gentilium ore in Christianos solita jactari contumelia, nimirum quòd essent inertes; quam quidem refellens Tertullianus hæc ait: ^(u) Sed alio quoque injuriarum titulo postulamur, & infructuosi in negotiis dicimur. Sed in pravis operibus Christianos omnino frigidos inertesque se habere, in bonis autem studiosos ac sedulos esse, pluribus monstrat. Quamobrem quod erat summæ virtutis specimen in CLEMENTE, quòd, cùm filios Imperatores posset habere, dummodo eadem quæ Domitianus numina coleret, prætulisset his omnibus ignominiam Crucis, Suetonius contemptissimæ ascribit inertiae.

Dio verò Cassius FLAVII CLEMENTIS mortem mortisque causam breviter ita narrat: ^(x) Eodem anno, scilicet Domitiani XV. Domitianus cùm alios multos, tum verò FLAVIUM CLEMENTEM Consulem, etsi patruelem ejus erat, ac Flaviam Domitillam & ipsam Domitiani consanguineam uxorem habebat, morte affecit, illato ambobus crimine impietatis. Quo crimine plures etiam alii Judaicos ad ritus exorbitantes damnati fuerunt: quorum pars occisa est, pars spoliata facultatibus. Domitilla in Pandatariam relegata est.

Cùm igitur Fasti omnes Domitiani Imperatoris & CLEMENTIS nomina præferant ad annum V. C. 848. æræ Christianæ XCV. Domitiani XV. CLEMENS cum Domitiano annum aperuit, ut ajunt, & fasces sumpsit ipsis Kalendis Januariis, gessitque ex temporum illorum institu-

to

(t) *Ad ann. Chr. 98. n. 1.* [u] *In Apol. c. 42. &c.* [x] *T. 57. p. 766. A.* καὶ τῶ αὐτῶ ἐτει &c.

to per menses duos , nondum ut quidem arbitror, Christianus. Neque enim fasces aut Domitianus offerre Christiano tam infensus Christiano nomini, aut oblatos recipere homo Christianus cum illis, qui tum vigeabant sacrificiorum ac profanarum cærimoniarum ritibus, potuisse mihi videtur. Ad Consulum quippe dignitatem transferri potest id, quod de Cæsaribus Tertullianus pronunciavit :

[¹] *Cæsares credidissent super Christo, si aut Cæsares non essent seculo necessarii, aut si & Christiani potuissent esse Cæsares.* Est itaque verius, T. FLAVIVM CLEMENTEM post absolutos duos Consulatus sui menses Christianis Sacris imbutum esse, quæ jam ante annos admodum undetriginta Plautilla soror, & Flavia Domitilla sororis filia a S. Petro Apostolorum principe didicerant; ad eadem accessisse Flaviam Domitillam conjugem, atque ubi res innotuit Domitiano, CLEMENTEM sub hujus anni finem ejus jussu interemptum, Domitillam paulopost relegatam fuisse, aliquot mensibus antequam Domitianus ipse occideretur. Atque ita verè scripsit Dio

[²] *CLEMENTEM à Domitiano mori jussum, non ὑπάτευσαντα, qui Consul fuerat, sed omnino ὑπάτεοντα, qui Consul tum erat, cuius nomine hic ipse annus numerabatur; & Philostratus*

[^a] *αὐδρα ὑπάτεον, Consulem non Consularem; & Eusebius.* [^b] *ἑνα τῶν τυνάδε ὑπάτων, unum ex iis qui tum erant Consules.* Quare ad sensum & Dionis & Philostrati & Eusebii manifestum accommodari necesse est hæc Suetonii verba : [^c] *tantum non ipso ejus consulatu interemit, quo maximè facto maturavit sibi exitum.* Liceat igitur in rebus ejusmodi conjicere, Flaviam Domitillam non statim a mariti nece, quod quidem Philostratus (^d) indicat,

(¹) *Apok. c. 21. pag. 22. edit. Paris. 1641.* (²) *L. 67. pag. 766. A.* (^a) *Vit. Apoll. l. 8. c. 25.*

(^b) *Hist. l. 3. cap. olim 14. jam 18.* [^c] *In Domit. c. 15.* (^d) *Vit. Apoll. l. 3. c. 10.*

dicat, in exilium fuisse deportatam, & illam in Domitiani caput conjurationem, cujus participes fuisse Christianos minimè credibile est, paulatim coaluisse, & post decem ferè à T. FLAVII CLEMENTIS morte menses adultam tandem erupisse, atque ita Domitianum a Stephano Domitillæ procuratore & aliis conjuratis, quos Suetonius ^[e] appellat, fuisse interemptum *XIV. Kal. Octobris* anni sequentis, qui fuit V. C. 849. æræ Christianæ XCVI.

Jam verò quo potissimum die T. FLAVII CLEMENTIS mors ^[f] *pretiosa in conspectu Domini* contigerit, non ita facile est definire. Et ille quidem qui Chronicon mentito Flavii Lucii Dextri nomine vulgavit, hæc apposuit ad annum Christi LXXXVI. ^(g) *FLAVIUS CLEMENS vir Consularis occiditur pro fide vicesimo primo Novembris, familiaris Martiali*; quo die Martyrem aliquem Clementem nomine Romæ coli pauci, nec satis certis auctoribus produnt. ^(b) Nul-
lus certè Clemens ad diem Novembris XXI. appellatur in Martyrologio Ufuardi, quod R. P. Joannes Baptista Solle-
rius ⁽ⁱ⁾ illustravit. Et hunc tamen Clementem esse oportet, quem Pseudo-Dexter FLAVIVM CLEMENTEM virum Consularem fuisse vel credidit, vel ab aliis credi voluit. Sed qui martyrii diem ipsum statuere ausus est, sic erravit in anno assignando, ut excusari aut defendi temeritas ejus nequeat. Nullo enim pacto mori potuit anno LXXXVI. vir ille *Consularis*, quem constat non fuisse *Consulem* nisi anno XCV. Quod addit Pseudo-Dexter FLAVIVM CLEMENTEM fuisse *familiarē Martiali*, nescio unde desumpserit. Sanè perleve hujus rei affirmandæ fundamen-
tum

(e) In Domit. c. 17. [f] Psalm. cxv. 15. [g] Pag. 176. edit. Lugd. fol. ann. 1627.

(b) Vide Florentinum ad diem XXI. Novembris pag. 990. [i] Inter Acta S. S. tom. VII. Junii pag. 689.


tum habuit in uño Martialis epigrammate ^(κ) scripto ad *Clementem* quemdam, qui qualis quisve fuerit, ex ipso epigrammate deprehendi non potest. Sed nimirum ille rerum Hispanicarum ultra quàm veritas patitur, ultra etiam quàm Hispani ipsi velint, gloriosus ostentator, cum T. FLAVIVM CLEMENTEM virum Consularem ac Martyrem, Hispanum facere honestè non posset, facere certè voluit Hispano familiarem.

At quoniam aliquot Martyrologia vetera, inprimis illud quod S. Hieronymo tribuitur, editum a Francisco Maria Florentinio, ^(l) & alterum, cujus fragmentum editum est ab Ægidio Bucherio, ^(m) præter cetera quæ Florentinius ⁽ⁿ⁾ recenset, duos Clementes Martyres ponunt Novembri mense, alterum ad IX, ^(o) non VII. ut scribunt ^(p) quidam, Novembris diem, ^(q) alterum ad tertium & vicesimum, ^(r) facilè adducor ut suspicer T. FLAVIVM CLEMENTEM virum Consularem illum esse, qui nono Novembris die passus esse dicitur cum Simprono, vel ut in Martyrologii fragmento Bucheriano ^(s) dicitur, Semproniano, vel quemadmodum R. P. Joannes Baptista Solerius edidit inter *Auctaria* ad Martyrologium Usuardi, ^(t) Simphroniano, fortasse pro Symphoriano. Nam is cujus memoria recolitur Romæ die Novembris XXIII, & quem pleraque Martyrologia Episcopum & Martyrem vocant, alius esse non potest a S. Clemente Papa ejus nominis primo. ^(u) Nostrum verò FLAVIVM CLEMENTEM & Romæ vitam pro Christi fide posuisse certum est, & om-

(κ) L.x.epigr.93. [l] Lucæ fol.ann.1668. (m) De Decr.temp.pag.269. (n) Pag.960.
 (o) Sive v.Idus Novembris. (p) Tillem.tem.2.part.1.pag.226.edit Brux.quamz is alibi ix.
 scripserit, & alii. (q) Romæ Natalis SS.Clementis & Simproni. (r) Romæ.Natalis S.Clemen-
 tis Episcopi & Martyris. (s) Pag.269. (t) Tom.vii.Junii p.663. (u) Vide Sellar.Ibid.pag.594.

& omnino dignum fuisse, cujus nomen in albo Sanctorum ascriberetur, in quod Plautillæ sororis, & Domitillæ sororis filiæ nomina relata sunt; & ascriptum si fuit, ad aliquem anni exeuntis diem ascribi oportuit; & nullus est sub anni finem dies præter diem Novembris nonum, ad quem probabilius dici possit FLAVII CLEMENTIS viri Consularis & Martyris nomen ascriptum fuisse.

Atque hæc pauca quæ de T. FLAVII CLEMENTIS viri Consularis & Martyris tumulo disputavi, si negem optare me ut viris eruditis ac bonis placeant, mentiar; studium certè & obsequendi voluntatem Eminentissimo S. R. E. Cardinali Camerario placituram esse confido. Cetera verò quæ paraveram, præsertim de Imperio Gentis FLAVIÆ per annos XXVII. & menses duos cum dimidio ex nummis aliisque monumentis veteribus accuratè digesto, in aliud tempus reservanda sunt.



SPECIAL 93-A
4958

